

ԵԵՐԱԿՐԻՍՏԻԱՆ ՄԱՍԿՐԱՆ

ՄԱՅՐ ԱՅԹՈՒ ՍՈՒՐԲ ԷԶՄԻԱԾՆԻ
ԿՐԻՍՏԻԱՆՍԿԱՆ, ՄՇԱԿՈՒԹԱՅԻՆ,
ԼՐԱՏՎԱԿԱՆ ԵՐԿՇԱԲԱԹԱԹԵՐԸ

Պայծառակերպության տոնը Մայր Աթոռ Սուրբ Էջմիածնում

Նույսի 27-ին՝ մեր Տեր և Փրկիչ Հիսուս Քրիստոսի Պայծառակերպության տոնի առիթով, Միածնաէջ Մայր Տաճարում, համ-դիսապետությամբ Ն. Ս. Օ. Տ. Տ. Գարեգին Երկրորդ Ծայրագույն Պատրիարք և Ամենայն Հայոց Կաթողիկոսի, մատուցվեց Սուրբ և Ամ-մահ Պատարագ:

Պատարագիչն էր Մայր Աթոռ Սուրբ Էջմիածնի դիվանապետ Գե-րաշմորի Տ. Արշակ արքեպիսկո-պոս Խաչատրյանը:

Սրբազան արարողությանը ներ-կա էին հայաստանյան և սփյուռ-քյան թեմերի առաջնորդներ, Մայր Աթոռում պաշտոնավարող եպիսկոպոսներ և միաբաններ, բարերարներ, Կաթողիկոսական դամբարանի և մոմավառության աղոթասրահի բացման առիթով Հայաստանից ու սփյուռքից ժա-մանած հյուրեր և ուխտավորներ:

Սուրբ Պատարագի ընթացքում տոնի խորհրդի վերաբերյալ բա-րոզեց պատարագիչ Արշակ արքե-պիսկոպոսը:

«Պայծառակերպությամբ Հի-սուս գոտեպնդում է առաքյալնե-րին, ցույց տալիս աստվածային իր ամենագործությունն ու կարողու-թյունը: ...Մենք համախմբվել ենք նվիրական այս սրբավայրում՝ մեկ անգամ ևս վերապրելու Հիսուսի Պայծառակերպության, նրա սրբա-զան աղոթքի նվիրական պահը: Հավաքվել ենք աղոթքով մենք ևս պայծառակերպվելու»,— մշեց պա-տարագիչ Սրբազանը՝ ընդգծելով, որ աղոթքով ձգտում ենք փոխա-կերպվել, խոստանում ենք հեռա-նալ ու մերժել անցյալի մեղքերն ու սխալները, Աստուծոց գործունե-ստանալ ապագայի հոգևոր մար-տերում հաղթելու համար:

«Պայծառակերպված Հիսուս շա-րունակում է մեզ դուրս բերել մեղքի և ապականության տիրոջ, և Նրա լուսավոր զգեստների քղանցքե-րին կպած՝ մենք շարունակում ենք ձգտել սրբության, փրկության և անապականության:



Ամպամած ու մռայլ է այսօր մեր կյանքը՝ լի մտահոգություններով ու մարտահրավերներով, ծանր մար-տահրավերներով, որոնք մթագ-նում են կարծեք ապագայի լույսը: Մշուշված են հորիզոնները հայոց կյանքի: Մթնոլորտը շիկացած է թշնամանքով, ատելությամբ և հա-կառակություններով: Շփոթմուն-քի և խուճապի մեջ, վախերի ու տագնապների ազդեցության տակ գետնամած ու կծկված ենք մենք, ինչպես առաքյալները: Բայց մեր հուզումն ու երկյուղը Հիսուսի պա-յ-

ծառակերպված դեմքից չեն, այլ մեր պայծառակերպվելու կամքի տկարությունից: Աղոթքը նվազել է մեր կյանքում, խոսքն ու վազքը՝ շատացել: Մենք խոսքից առավել պետք ունենք լռության, վազքից առավել՝ խոկունի և խորհրդածու-թյան: Խղճի ազատություն փնտրե-լուց առաջ պետք ունենք խղճի, մտքի ազատություն փնտրելուց առաջ պետք ունենք մտքի: Թե չունեն խիղճ և չունեն միտք, ազա-տությունը կդառնա բեռ ու փորձու-թյուն:

Խոսելուց և գործելուց առաջ պետք է աղոթել: Լավ է լռել և ան-շարժանալ, քան թե խոսել և գոր-ծել առանց աղոթքի, առանց խոր-հելու: Պայծառակերպությունն աղոթքի արդյունքն է՝ բարի խոսքի և բարի գործի երաշխիքը: Պետք է լռեն ձայները՝ աղոթքով չանուց-վող լեզուների, պետք է դադարեն քայլերը՝ աղոթքով չընթացող ոտ-քերի: Աղոթքով պայծառակերպ-վենք, ապա և խոսենք ու գործենք: Հիսուսի պայծառակերպված դեմ-քը, արեգակի մման բոցավառվող աչքերը մեր առջև բացում են մի հրաշալի ճանապարհ՝ հանրա-յին հաշտության և համագգային համերաշխության ճանապարհ, փրկության և ազատագրության ճանապարհ»,— ասաց Արշակ Ար-քեպիսկոպոսը:

Իր խոսքում պատարագիչ Սրբազանը հորդորեց ներկաժե-րին Տիրոջ Պայծառակերպության խորհրդով մաքրել մտքերն ու խոր-հուղները, ցրել հորիզոնի մշուշը, հեռացնել կյանքի ճանապարհը փակող գերեզմանի քարը, բացել հարության դռները, որպեսզի վեր հանձնի մեր կյանքում հաղթանակի ու վերածննդյան ոգին:

«Թող արևները լուսավորեն հա-մագգային մեր կյանքի մթին խոր-շերը, թող պատերազմի կորուստ-ներից ու ցավերից բեկված մեր ժողովուրդն ամրանա հույսով ու հավատով, թող արժանապատ-վությունն ու պատվախնդրությունը ոռոգեն մեր հաղթական ճանա-պարհը, և թող Տիրոջ արդար ձեռ-քը ծանրանա նրանց վրա, ովքեր մարտնչում են Աստուծո և Իր Սուրբ Եկեղեցու դեմ, թող ծանրանա նրանց վրա, ովքեր հարվածում են հիմներին հայոց պետության և փոր-ծում ոչնչացնել հայոց ինքնություն-ը: Թող նրանց դաժան վախճանը դառնա նախազգուշացում սե-րունդներին, որպեսզի ոչ ոք այ-լևս չհանդգնի խավարի գործերով կործանել այն, ինչ Աստված Ինքն է օրհնել»,— մշեց Սրբազան Հայրը՝ մաղթելով, որ պայծառակերպված Հիսուսի լույսով խաղաղ մնա Հա-յոց աշխարհը, անհաղթահարելի՝ Հայոց պետությունը, և անսասան՝ Հայոց Եկեղեցին՝ Սուրբ Էջմիածնի հայրապետական աստվածահա-տատ իր Աթոռով, համերաշխ ու արժանապատիվ՝ մեր ողջ ժողո-վուրդն ի Հայաստան և ի սփյուռս աշխարհի:



Մայր Աթոռ Սուրբ Էջմիածնում տեղի ունեցավ Կաթողիկոսական դամբարանի և մոմավառության աղոթասրահի բացման արարողությունը

Նույսի 27-ին՝ մեր Տեր Հիսուս Քրիստոսի Պայծառակերպու-թյան տոնին, Մայր Աթոռ Սուրբ Էջմիածնում, նախագահությամբ Ն. Ս. Օ. Տ. Տ. Գարեգին Երկրորդ Ամենայն Հայոց Կաթողիկոսի, տեղի ունեցավ Մայր Տաճարի շրջաբակում կառուցված Կաթո-ղիկոսական դամբարանի և մոմա-վառության աղոթասրահի բացման արարողությունը:

Կաթողիկոսական դամբարանը և մոմավառության աղոթասրահը կառուցվել են ազգային բարերար հոգեւոյս Գառնիկ Յակոբյանի և տիկին Անահիտ Չաթալպաշյան-Յակոբյանի հովանավորությամբ: Ծարտարապետներն են Ասլան Մխիթարյանը և Հայկ Մկրտչյանը, իսկ շինարարությունն իրականաց-րել է «Հորիզոն 95» ՍՊԸ:

Արարողությանը ներկա էին հա-յաստանյան և սփյուռքյան թեմե-րի առաջնորդներ, Մայր Աթոռում պաշտոնավարող եպիսկոպոսներ և միաբաններ, բարերար տիկին Անահիտ Չաթալպաշյան-Յակո-բյանը և Յակոբյան ընտանիքի անդամներ ու հարազատներ, այս առիթով սփյուռքից ու Հայաստա-նից ժամանած ուխտավոր հայոր-դիներ:

Տեղի ունեցավ Կաթողիկոսական դամբարանի և մոմավառության աղոթասարահի բացման արարողությունը


← էջ 1

Արարողությունն սկսվեց Հայ-րապետական հանդիսավոր թափորով: Վեհափառ Հայրապետի ընթերականերն էին Կանադայի հայոց թեմի առաջնորդ Գերաշնորհ Ս. Աբգար եպիսկոպոս Յովակիմյանը և Մայր Աթոռի Վարչատնտեսական բաժնի տնօրեն Գերաշնորհ Ս. Մուշեղ եպիսկոպոս Բաբայանը: Հընթացս արարողության՝ շարականների ու սաղմոսերգության ներքո, ջրով և գինով լվացվեցին աղոթասարահի երկու մատուռների Սուրբ Սեղանները: Այնուհետև աղոթքների ընթերցումից հետո Սրբալույս Մյուռնոնով Ամենայն Հայոց Կաթողիկոսն օծեց դրանք՝ անվանակոչելով մատուռները հայոց առաջին լուսավորիչներ Սուրբ Թադեոս և Սուրբ Բարդուղիմեոս առաքյալների անուններով: Այս առիթով մատուռներում զետեղվեցին նաև առաքյալների մատուցներ:

Բացման արարողության ավարտին կատարվեց հոգեհանգստյան կարգ ազգային բարերար լուսա-հոգի Գառնիկ Յակուբյանի, Յակուբյան և Չաթալպաշյան գերդաստանաց ննջեցյալների հոգու խաղաղության համար:

Բացման արարողության առիթով Ամենայն Հայոց Հայրապետն իր հայրական պատգամը փոխանցեց ներկաներին՝ գոհություն մատուցելով առ Բարձրալյան Աստված, որ հայոց հոգևոր կենտրոնում՝ Սուրբ Էջմիածնում, մեր ժողովրդի հոգևոր մխիթարության, հավատքի զորացման նվիրական մի նոր սրբատեղի հառնեց:

«Հայրապետների շիրիմների ամ-



փոփման համար պանթեոն կառուցելու այսպիսի նախաձեռնություն ծրագրվել էր տակավին 1955 թ.՝ Վազգեն Ա երջանկահիշտակ Ամենայն Հայոց Կաթողիկոսի օրոք: Մեզ համար մեծ ուրախություն եղավ, որ նախապես տեղյակ չլինելով այս նախաձեռնությանը՝ Մենք նույնպես մտահոգացում ունեցանք Կաթողիկոսական դամբարան հաստատելու Սուրբ Էջմիածնում, որն այսօր արդեն հոյաշեն կերպով իրագործված՝ հավատավոր մեր ժողովրդի համար ծառայելու է նաև որպես մոմավառության աղոթասարահ: Փառք ենք տալիս Ամենակալ Աստծուն, որ մեծանուն բարերար տիար Գառնիկ Յակուբյանի և իր ազնիվ կողակցի՝ տիկին Անահիտի հովանավորությամբ կյանքի կոչվեց այս ձեռնարկունը:

Կաթողիկոսական դամբարանը, սիրելիներ, ամփոփավայրն է լինելու մեր Սուրբ Եկեղեցու ննջեցյալ Յովակիմյանների, որոնց կյանքը եղել է ամբողջանվիրում Աստծուն, ազգին ու հայրենիքին: Դամբարանը զալիք սերունդներին յուրովի հիշեցնելու է Ամենայն Հայոց Կաթողիկոսների հոգեխնամ առաքելության մասին, որով բարեգարդվել ու ծաղկել է համայն մեր ժողովրդի ազգային և եկեղեցական անդաստանը: Մեր Սուրբ Եկեղեցու երջանկահիշատակ Ամենայն Հայոց Կաթողիկոսների ծառայությունը լի է եղել զոհողությամբ, Քրիստոսապատգամ սիրո, արդարության և ճշմարտության քարոզչությամբ, բայց նաև հայրական հորդորով ու քաջալերությամբ՝ ապրելու և արարելու առ Աստված հավատով հանուն ազգի ու հայրենյաց:— ասաց Վեհափառ Հայրապետը՝ հավելելով, որ երանաշնորհ Հայրապետներն իրենց ողջ գործունեության ընթացքում եղել են հավատքի քաջ վկաներ, հույսի լուսատուներ մութ ու խավար ժամանակների մեջ, արիության ու հաստատակամության օրինակ հայ ժողովրդի համար՝ ծառացած դժվարություններն ու նեղությունները հաղթահարելու

և նորանոր հաջողություններ արձանագրելու: Դիմելով ներկաներին՝ Նորին Սրբությունն ընդգծեց, որ մեր օրերում, երբ տարբեր կեղծ գաղափարախոսություններով խաթարվում է մեր արժեհամակարգը, եղծվում ու նենգափոխվում են հոգևոր ընկալումները, այսպիսի եկեղեցական շինությունները, սրբավայրերն ու ուխտատեղիները իրենց կրոնական և ծիսական կարևոր նշանակությամբ հավատքի զորացման, հոգու փրկության և աստվածահաճո կյանքի ամրապնդման օրհնաբեր օջախներ են: «Այս կառույցը, արդարև, սոսկ քարեղեն շինվածք չէ, այն աղոթքի տուն է, հավատացյալների ապավինության վայր՝ Սուրբ Թադեոս և Սուրբ Բարդուղիմեոս առաքյալների մատուռներով, որտեղ պաշտամունքային արարողություններ են մատուցվելու, և հավատացյալներն իրենց սրտառու հայցն ու աղոթքն են վերառաքելու Տիրոջը: Այսպիսի օրինյալ վայրում



հավատացյալի հետ հանդիպում են ժամանակն ու հավերժությունը, երկնավորն ու երկրավորը, քանզի հոգուց բխած աղոթքները երկինք են հասնում և աստվածային օրհնությունն են հեղում Փրկչին հուսացողների սրտերին»,— մշեց Հայոց Յովակիմյանը:

Իր խոսքում Ամենայն Հայոց Կաթողիկոսն ընդգծեց, որ Կաթողիկոսական դամբարանի և մոմավառության աղոթասարահի կառուցումը ազգի զավակների անշիջանելի հավատքի, բարեգործության ազնիվ ոգու, արժանավորին արժանին մատուցելու երկնահաճո արտահայտություն է: Այս կապակցությամբ, երախտագետ զգացումներով հիշելով մեծանուն բարերար հոգեւույս Գառնիկ Յակուբյանին և Յակուբյան ընտանիքի բացառիկ աստվածսիրությունն ու ազանվիրությունը, ի գնահատություն այս գովարժման իրագործման՝ Նորին Սրբությունը մեծազնիվ տիկին Անահիտ Չաթալպաշյան-Յակուբյանին շնորհեց «Սուրբ Էջմիածին» բարձրագույն շքանշան, իսկ որդուն՝ Արամ Յակուբյանին՝ «Սուրբ Գրիգոր Լուսավորիչ» պատվո բարձրագույն շքանշան:

Վերջում Հայոց Հայրապետը մաղթեց, որ տերունաշնորհ հավատքի լույսը մշտավառ լինի հայ ժողովրդի հոգում, և այս սրահից ևս հանապազ հնչի հայցն առ Աստված՝ հայրենյաց խաղաղության, ազգի բարօրության, Սուրբ Եկեղեցու պայծառության համար:

Արարողության մասնակիցները Մայր Տաճարում ներկա գտնվեցին Պայծառակերպության տոնի առիթով մատուցված Սուրբ և Ամսահ Պատարագին:

ԸՆԴՈՒՆԵԼՈՒԹՅՈՒՆՆԵՐ ՎԵՀԱՐԱՆՈՒՄ

Ամենայն Հայոց Կաթողիկոսն ընդունեց



Հուլիսի 16-ին ԱՄՆ հայոց արևելյան թեմի ուխտավորներին

Ն. Ս. Օ. Տ. Տ. Գարեգին Երկրորդ Ծայրագույն Պատրիարք և Ամենայն Հայոց Կաթողիկոսն ընդունեց ԱՄՆ հայոց արևելյան թեմի «Հայաստան ծառայության» ծրագրի երիտասարդ մասնակիցներին՝ առաջնորդությամբ Ֆիլադելֆիայի Սուրբ Երրորդություն եկեղեցու հոգևոր հովիվ Արժանապատիվ Տեր Հակոբ քահանա Փնորգյանի:

Տեր Հակոբը Հայոց Յովակիմյան տեղեկացրեց, որ ծրագրի շրջանակներում երիտասարդ հայորդիները Հայաստանում մասնակցել են համայնքային կամավորական ծրագրերի, ինչպես նաև այցելել Հայաստանի տարբեր սրբավայրեր՝ զորացնելով իրենց հայրենաճանաչությունը:

Ամենայն Հայոց Կաթողիկոսը, իր հայրա-

կան օրհնությունը բաշխելով երիտասարդներին, զնահատեց նրանց մասնակցությունը կամավորական ծրագրերին: Վեհափառ Հայրապետը նաև գոհունակություն հայտնեց, որ ուխտավոր երիտասարդները ամուր են պահում իրենց կապը Եկեղեցու հետ՝ գիտակցությամբ, որ հավատարիմ մնալով ազգային արժեքներին՝ կարող են անխաթար պահպանել իրենց ինքնությունը:

Իր խոսքում Նորին Սրբությունը վստահություն հայտնեց, որ երիտասարդները հոգևոր նոր լիցքերով և ներշնչանքներով կվերադառնան իրենց համայնքներ և իրենց ազգանվեր ծառայությամբ օգտակարություն կբերեն հայրենիքին և Մայր Եկեղեցուն:



այս տարի առաջին անգամ է անցկացվում Հայաստանում և համախմբել է շուրջ 4000 երիտասարդ հայ արիեստավարժների աշխարհի տարբեր կողմերից՝ նպատակ ունենալով ստեղծել համախոհների ցանց, ընդլայնել անձնական ու մասնագիտական կապերը և ընդգրկել ՀՀԲՄ համաշխարհային գործունեության մեջ: Տիար Յակուբյանը նաև իր երախտագիտությունը հայտնեց Հայոց Հայրապետին՝ ծրագրի մասնակիցներին հյուրընկալելու և աշխատաժողովը Մայր Աթոռում իրականացնելու հնարավորության համար, ինչն էլ ավելի կամրապնդի երիտասարդների կապը Հայոց Եկեղեցու հետ և կնպաստի ազգային ինքնության վերարժևորմանն ու զորացմանը:

Այնուհետև ներկաներին իր օրհնությունն ու պատգամը բերեց Ամենայն Հայոց Կաթողիկոսը՝ բարձրորեն գնահատելով ՀՀԲՄ կողմից իրականացվող նմանօրինակ ծրագրերը, որոնց շնորհիվ տարբեր երկրներում բնակվող հայորդիները հնարավորություն են ստանում մեկտեղվելու հայրենիքում, շփվելու միմյանց հետ և համատեղ ծրագրեր մշակելու՝ ի նպաստ ՀՀԲՄ առաքելության արդյունավորման և ի պայծառություն հայրենիքի:

Հայոց Հայրապետը գոհունակությամբ

անդրադարձավ նաև Մայր Աթոռի և ՀՀԲՄ միջև ձևավորված սերտ կապերին ու փոխգործակցությանը՝ կարևորելով միության ամուրամալի ներդրումը Հայ Եկեղեցու առաքելության արդյունավորման գործում: Նորին Սրբությունը վստահություն հայտնեց, որ հայրենիքից ստացած տպավորությունները նոր ոգեշնչման աղբյուր կդառնան երիտասարդների համար՝ առավել նախանձախնդիր լինելու ազգային արժեքներին ու սրբություններին և իրենց ներդրումը բերելու հայ կյանքին:

Վերջում Հայոց Հայրապետը հորդորեց հայորդիներին ազգային-եկեղեցական կյանքում և հայրենիքին օգտակարություն բերելու գործում ներշնչվել ՀՀԲՄ երախտարժան նախագահների ու կենտրոնական վարչության անդամների զովելի օրինակով, իրենց գիտելիքներն ու փորձառությունը ծառայեցնել ազգային կյանքի պայծառությանը:

Վեհափառ Հայրապետը պատասխանեց նաև ներկաների հարցերին, որոնք վերաբերում էին երիտասարդների ներգրավվածությանը եկեղեցական կյանքում, հոգևորականների պատրաստությանն ու ծառայությանը, հայրենիքի առջև ծառացած մարտահրավերներին: ➔ էջ 3

Հուլիսի 17-ին «ՀԲԲ Ֆոկուս» ծրագրերի մասնակիցներին

Ամենայն Հայոց Կաթողիկոսն ընդունեց «ՀԲԲ Ֆոկուս» ծրագրի մասնակիցներին՝ ուղեկցությամբ Հայկական բարեգործական ընդհանուր միության՝ Հայաստանի նախագահ, ՀԲԲ Կենտրոնական վարչության ան-

դամ Վազգեն Յակուբյանի:

Հանդիպմանը տիար Յակուբյանը Նորին Սրբությանը տեղեկացրեց, որ ՀԲԲ երիտասարդական նախագծերի շրջանակներում իրականացվող «ՀԲԲ Ֆոկուս» ծրագիրն

Ամենայն Հայոց Կաթողիկոսն ընդունեց

← էջ 2



Հուլիսի 20-ին ԶՅԴ երիտասարդական և ուսանողական 12-րդ Համահայկական բանակումի մասնակիցներին

Ամենայն Հայոց Կաթողիկոսն ընդունեց Հայ հեղափոխական դաշնակցության երիտասարդական և ուսանողական 12-րդ Համահայկական բանակումի մասնակիցներին՝ ուղեկցությամբ ՀՀԴ Բյուրոյի անդամ Հովսեփ Տեր-Պետրոսյանի և ՀՀԴ Հայաստանի զմայնակ Գեղամ Մանուկյանի:

Հանդիպմանը տիար Հովսեփ Տեր-Պետրոսյանը, հայցելով Ամենայն Հայոց Հայրապետի օրհնությունը, ընդգծեց, որ այս տարվա ՀՀԴ Համահայկական բանակումն իրականացվում է «Պիտի վերադառնալ» կարգախոսով, ինչը կարևոր ուղեծր է՝ վերադառնալու մեր արմատներին ու մեր հոգևոր-ազգային արժեքներին:

Այնուհետև Նորին Սրբությունն իր հայրական օրհնությունը բերեց ներկաներին՝ գնահատանք հայտնելով ՀՀԴ երիտասարդական և ուսանողական միությունների պատասխանատվությունը՝ տարբեր երկրներից հայորդիների հայրենիքում պարբերաբար համախմբելու համար, ինչը լավագույն առիթ է զորացնելու նրանց ազգային-հոգևոր նկարագիրը և նվիրումն առ հայրենին:

Հուլիսի 24-ին ԶԶ-ում իր դիվանագիտական առաքելությունն ավարտող Լիբանանի դեսպանին

Ամենայն Հայոց Կաթողիկոսն ընդունեց Հայաստանի Հանրապետությունում իր դիվանագիտական առաքելությունն ավարտող

Վեհափառ Հայրապետը, խոսելով ազգային ինքնությունն անխաթար պահելու և հոգևոր արժեքներով առաջնորդվելու հրամայականի մասին, ընդգծեց, որ հայրենիքի նկատմամբ անսակարկ սիրով ու ազգային նկարագրով երիտասարդն է հայրենիքի ամրությունը և ազգի հարատևությունը:

Անդրադառնալով Արցախի բռնազավթման, հայրենագրված արցախահայության իրավունքների պաշտպանության և Ադրբեջանում մինչ օրս պահվող հայ գերիների վերադարձման, Արցախի հայկական հոգևոր-մշակութային ժառանգության պահպանության խնդիրներին ու երկրում տիրող դժվարին կացությանը՝ Հայոց Հայրապետը կարևորեց ազգային միաբանությունը՝ ի սեր հայրենիքի և համուն համազգային շահերի ու առկա մարտահրավերների հաղթահարման:

Վերջում Նորին Սրբությունը մաղթեց, որ ազգասիրության զորեղ ոգին ու կամքը մշտապես ուղեկից լինեն հայ երիտասարդներին՝ համընդհանուր ճիգերով զորացյալ կերտելու հայրենիքի անվտանգությունը, մեր ժողովրդի խաղաղ ու բարօր կյանքը:

Լիբանանի Հանրապետության արտակարգ և լիազոր դեսպան տիկին Մայա Դադերին: Վեհափառ Հայրապետն իր գնահատանք

ըր հայտնեց դեսպանին Հայաստանում իրականացրած առաքելության համար: Նորին Սրբությունը գոհունակությամբ անդրադարձավ երկու ժողովուրդների միջև առկա ջերմ հարաբերություններին, նաև խոսեց երկրների առջև ծառացած մարտահրավերների մասին՝ վստահություն հայտնելով, որ դրանք կհաղթահարվեն ժողովուրդների զորեղ հավատքի ու լավատեսական ոգու շնորհիվ:

Զրույցի ընթացքում տիկին Մայա Դադերն արձանագրեց, որ երկու երկրների բարեկամությունը պիտի շարունակի նորամուր արդյունքներ գրանցել և առավել ամրապնդվել:

Վերջում Ամենայն Հայոց Կաթողիկոսը դեսպանին հաջողություններ մաղթեց հետագա ծառայության մեջ:




Հուլիսի 25-ին ԱՄՆ հայոց արևելյան թեմի ուխտավորների

Ամենայն Հայոց Կաթողիկոսն ընդունեց ԱՄՆ հայոց արևելյան թեմի Նյու Յորքի Սուրբ Գրիգոր Լուսավորիչ եկեղեցու համայնքի ուխտավորներին՝ ուղեկցությամբ հոգևոր հովիվ Արժանապատիվ Տ. Մեսրոպ քահանա Հովսեփյանի:

Նորին Սրբությունն իր օրհնությունը փոխանցեց Սուրբ Գրիգոր Լուսավորիչ եկեղեցու համայնքի անդամներին՝ կարևորելով նրանց այցը համայն հայության հոգևոր կենտրոն՝ իբրև սիրո և հավատարմության դրսևորում Սուրբ Էջմիածնի նկատմամբ:

Վեհափառ Հայրապետը վստահություն հայտնեց, որ ուխտագնացությունը Հայաստան ներշնչանքի աղբյուր պիտի դառնա հայորդիների համար՝ դժվարին այս ժամանակներում առավել զորանալու իրենց հայրենամարտիկական և եկեղեցասիրական մեջ:

Ամենայն Հայոց Հայրապետը պատգամեց ուխտավորներին ամենայն ջանք ի գործ դնել իրենց համայնքի պայծառության, զավակների հայեցի դաստիարակության, ազգային ինքնության պահպանության և հայրենիքի շենացման համար:



ՀԲԸՄ-ի սկաուտական բանակումի մասնակիցներն այցելեցին Մայր Աթոռ Սուրբ Էջմիածին

Նույնիս 24-ին Մայր Աթոռի Արտաքին հարաբերությունների և արարողակարգի բաժնի տնօրեն Գերաշնորհ Տ. Նաթան արքեպիսկոպոս Հովհաննիսյանը Մայր Աթոռում ընդունեց Հայկական բարեգործական ընդհանուր միության (ՀԲԸՄ)՝ Սիրիայի, Արգենտինայի և Երևանի «Անդրանիկ սկաուտական բանակումի» շուրջ 90 մասնակիցներին:

Սրբազան Հայրը, պատանի և երիտասարդ հայորդիներին փոխանցելով Ն. Ս. Օ. Տ. Տ. Գարեգին երկրորդ Ճայրագույն Պատրիարք և Ամենայն Հայոց Կաթողիկոսի հայրական օրհնությունն ու բարեմաղթանքները, կարևորեց սկաուտական բանակումի մասնակիցների այցը Հայաստան և Մայր Աթոռ Սուրբ Էջմիածին, ինչը լավագույն առիթ է զորացնելու նրանց ազգա-

յին-հոգևոր նկարագիրը և սերը հայրենիքի նկատմամբ:

Նաթան արքեպիսկոպոսը պատգամեց հայորդիներին նախանձախնդրորեն պահել և պահպանել իրենց ազգային ինքնությունն ու արժեքները, ամրապնդել կապը Հայոց եկեղեցու հետ և ջանքեր գործադրել օգտակարություն բերելու հայրենիքի պայծառությանն ու առաջընթացին:

Ամենայն Հայոց Կաթողիկոսն օրհնեց Հ. Մ. Ը. Մ. համահայկական 12-րդ մարզախաղերի մասնակիցներին

Նույնիս 29-ին ուխտավորաբար Մայր Աթոռ Սուրբ Էջմիածին այցելեցին Հայ մարմնակրթական ընդհանուր միության (Հ. Մ. Ը. Մ.) 12-րդ մարզախաղերի շուրջ 850 սկաուտներ՝ ուղեկցությամբ Կենտրոնական վարչության անդամներին:

Այս առիթով Ն. Ս. Օ. Տ. Տ. Գարեգին երկրորդ Ճայրագույն Պատրիարք և Ամենայն Հայոց Կաթողիկոսի հանդիսապետությամբ Միածնաէջ Մայր Տաճարում կատարվեց մարզախաղերի մասնակիցների օրհնության կարգ:

Արարողության ավարտին Նորին Սրբությունն իր հայրական պատգամն ու բարեմաղթանքները բերեց հայորդիներին՝ գոհունակություն հայտնելով, որ ավանդական

դարձած մարզախաղերի առիթով աշխարհի տարբեր կողմերից համախմբվել են հայրենիքում՝ մրցապայքարում դրսևորելու իրենց հմտություններն ու կարողությունները, միաժամանակ ճանաչելու և բարեկամաբար միմյանց հետ:

«Խիստ կարևոր է երիտասարդների մասնակցությունը նման վարժանքներին ու մրցույթներին, որոնք միջոց են՝ զորանալու մարմնով և հետևողական աշխատանքով, տոկունությամբ ու ոգու ամրությամբ արձանագրելու ապագա հաղթանակներ: Վարժանքներն ու մրցույթները միջոց են նաև զորանալու հոգով՝ Աստծուն ապավինած դիմակայելու բոլոր փորձություններին ու դժվարություններին և աննկուն ընթանալու դեպի հաղ-

թություն: Ուստի, պարբերաբար կազմակերպվող նման միջոցառումներն իրենց նշանակությամբ և առաքելությամբ ավելին են, քան սոսկ մարզական մրցույթներ», — մշեց Հայոց Հայրապետը:

Անդրադառնալով հայ ժողովրդի և հայրենիքի առջև ծառացած բազմաթիվ դժվարություններին ու խնդիրներին՝ Նորին Սրբությունն ընդգծեց, որ արցախյան պատերազմի հետևանքով հայրենիք երկիրը տակավին դիմագրավում է լրջագույն անվտանգային մարտահրավերների, կարիքի մեջ է տեղահանված արցախահայությունը, ներհասարակական կյանքում խորանում են անհամարաշխույթունն ու անհամընդունելիությունը, գերակշռող են և խորապես ան-

հանգստացմող ապագայի անորոշության զգացումները:

«Հավատում ենք, որ արդարությունը պիտի հաղթանակի, և համախուսը ջանքերով պիտի թույլ չտանք, որ մեր կյանքում գերակայեն եղբայրատյացությունը, կեղծիքն ու չարագործությունները, և խաթարվի ազգային միասնականությունը: Հայրենիքի համար այս պարագույն ջանքերն անգամ պետք չէ հուսահատվել և հիասթափություն ապրել: Դուք, որ ծնվել ու հասակ եք առել աշխարհի տարբեր երկրներում, ինչպես և Հայաստանում ու Արցախում, պատասխանատվություն ունեք մեր ժողովրդի լուսեղեն գալիքի կերտման գործում՝ ձեր ուժերն ու կարողությունները ծառայեցնելու

ի սեր ազգի ու հայրենիքի: Նաև դուք առաքելություն ունեք ազգային միաբանությունն ամրապնդելու, Հայաստան-Սփյուռք կապերն ամսասան պահպանելու և նորովի արդյունավորելու: Այս հանձնառության բարեհաջող իրագործման համար առանձնակի կարևոր են ձեր հայրենաճանաչությունը, ազգային ինքնագիտակցությունը, հայոց պետականության ամրապնդման կամքն ու վճռականությունը և դարերով նվիրագործված մեր արժեհամակարգի անխաթար պահպանումը: Դուք ապագան եք մեր հայրենիքի ու ազգի և երաշխիքը հայոց հարատևության, համընդհանուր մեր իղձերի ու երազանքների իրականացման:

→ էջ 4

Ամենայն Հայոց Կաթողիկոսն օրհնեց Հ. Մ. Ը. Մ. համահայկական 12-րդ մարզախաղերի մասնակիցներին

← էջ 3

Չեր այցը հայրենիք կարևոր քաջալերանք է հայրենաբնակ մեր ժողովրդի, ձեզ հասակակից ձեր քույրերի ու եղբայրների համար»,- ասաց Հայոց Հոգևորականության ղեկավարը՝ հորդորելով երիտասարդ սկսնակներին իրենց հոգում մշտապես պահել հայրենյաց սերը, ուժ առնել հարազատ հողից և բազմադարյա սրբություններից ու ներշնչվել մեր հայրերի հավատաշեն գործերից, հավատարիմ մնալ ազգային-հոգևոր արժեքներին, զորացնել իրենց սրտերում որդիական նվիրումն առ հայրենին, Սուրբ Եկեղեցին և Մայր Աթոռ Սուրբ Էջմիածինը:

Իր խոսքում Նորին Սրբությունը պատգամեց ուխտավորներին նաև անխախտ պահել իրենց ազգային ինքնությունը, հպարտանալ Հայոց պատմությամբ, նախնայաց կերտած ժառանգությամբ և հանուն արդարության, հանուն անկախ կյանքի



հայ ժողովրդի մղած անդուլ պայքարի հզոր ոգով:

«Միշտ արիասիրտ կանգնեք ի պաշտպանություն մեր ժողովրդի իրավունքների և նրա արդար դատի: Հայաստանում ձեր մեկտեղումն այս մշակակալի և անմոռանալի օրերը թող դառնան առիթ

ոգեշնչումի ու հանձնառության՝ ձեր գիտելիքներով ու շնորհներով բոլորովն օգտակար ծառայություններ բերելու ազգային կյանքում և նորանոր հաջողություններ արձանագրելու՝ ի շահ մեր ժողովրդի և հայրենիքի»,- հորդորեց Ամենայն Հայոց Հայրապետը՝ իր գնա-

հատանքը բերելով մարզախաղերի կազմակերպիչներին և բոլոր պատասխանատուներին իրենց նվիրյալ և ազգագուտ ծառայության համար:

Վերջում Նորին Սրբությունը հայցեց երկնավոր Տիրոջը, որ հայորդիներն ապրեն առողջ ու երջանիկ,



լինեն արժանավոր զավակները մեր հայրերի և իրագործեն նրանց նվիրական տեսլիքներն ու երազանքները:

Լրատվական նյութերը՝ Մայր Աթոռ Սուրբ Էջմիածին տեղեկատվական համակարգի

Եկեղեցու անկախությունը պետական իշխանության հակազդեցության պայմաններում

Վերջին ամիսներին լարված իրավիճակ է ստեղծվել Հայաստանի Հանրապետության կառավարության և Հայ Առաքելական Սուրբ Եկեղեցու հոգևորականության միջև: Թիրախում Հայոց Եկեղեցին է... Մենք չէ, որ պետք է կարծիք հայտնենք եկեղեցական կանոնների վերաբերյալ: Քրիստոս է հիմնադրել Եկեղեցին, ու միայն կանոնական իրավունքով օժտված եկեղեցական համապատասխան ժողովական մարմիններն իրավունք ունեն խոսելու Եկեղեցու և եկեղեցական կարգերի մասին: Սակայն որոշակի անհրաժեշտությունից ելնելով՝ որպես գիտաշխատողներ և աստվածաբաններ՝ փորձենք համառոտ լուսաբանել ներկայումս արծարծվող խնդիրները:

1. Ի՞նչ կարգով է կաթողիկոս ընտրվում Հայ Առաքելական Սուրբ Եկեղեցում:

Ամենայն Հայոց Կաթողիկոսը Հայ Առաքելական Սուրբ Եկեղեցու գերագույն հոգևոր առաջնորդն է, և նրա ընտրությունը համարվում է պատմական կարևոր իրողություն հայ ժողովրդի կյանքում: Նշենք, որ այս դեպքում կատարվում է երկու կարևոր արարողություն՝ ընտրություն Ազգային-եկեղեցական ժողովի կողմից և օծման, ձեռնադրման ու գահակալության ծիսակարգ:

Ամենայն Հայոց Կաթողիկոսին ընտրում է Ազգային-եկեղեցական ժողովը, որը Հայ եկեղեցու Գերագույն օրենսդիր մարմինն է: Ազգային-եկեղեցական ժողովի անդամներ են՝ Սուրբ Էջմիածնի Գերագույն հոգևոր խորհրդի անդամները (հոգևորականներ և աշխարհականներ, հայաստանաբնակ և սփյուռքի հայեր), Մեծի Տանն Կիլիկիո կաթողիկոսն իր եպիսկոպոսներով, Երուսաղեմի և Կ. Պոլսի պատրիարքներն ու պատրիարքությունների և միաբանությունների ներկայացուցիչները, Հայ եկեղեցու բոլոր եպիսկոպոսները, բոլոր թեմական առաջնորդները, յուրաքանչյուր թեմից մեկ կամ ավելի անդամներ: Ազգային-եկեղեցական ժողովը ներկայացնում է ողջ հայ ժողովրդի խոսքն ու կամքը:

Կաթողիկոսական ընտրությունից հետո Մայր Աթոռ Սուրբ Էջմիածնում՝ Սուրբ Խորանի վրա, կատարվում է Ամենայն Հայոց Կաթողիկոսի օծման և ձեռնադրության ծիսակարգը՝ որպես կանոն տասներկու եպիսկոպոսների ձեռնամբ (եթե չի ապահովվում եպիսկոպոսների 12 թիվը, ապա հնավանդ սովորության համաձայն՝ հնարավոր է ծիսակարգը կատարել նաև երեք եպիսկոպոսներով):

Ամենայն Հայոց Կաթողիկոսը հայ ժողովրդի հոգևոր հայրն է և իրավունք ունի և՛ բարոյական, և՛ քաղաքական, և՛ կրթական, և՛ գիտամշակութային ոլորտներում հորդորելու, խորհուրդ տալու, խրատելու իր ժողովրդին: Կաթողիկոսն է մշակակալ (որոշ թեմերում ընտրում են, իսկ Վեհափառը հաստատում է) և ազատում թեմական առաջ-

նորդներին, և նրա առանձնաշնորհն են հետևյալ ծիսական արարողությունները՝ Սուրբ Մյուռոնի օրհնություն, եպիսկոպոսական ձեռնադրություն, թագավորի օծում (այժմ չի կիրառվում): Հայ Առաքելական Սուրբ Եկեղեցու վարչական կառուցվածքի մեջ այժմ ընդգրկված են հետևյալ հիմնական միավորները՝ Ընդհանրական կաթողիկոսություն Ամենայն Հայոց (Սուրբ Էջմիածին), Կաթողիկոսություն Մեծի Տանն Կիլիկիո (Ամթիլիաս, Լիբանան), Երուսաղեմի Հայոց պատրիարքություն, Կ. Պոլսի Հայոց պատրիարքություն:

2. Արդյոք աշխարհիկ կառավարությունն իրավունք ունի կաթողիկոսի գահընկեց անելու:

Պատասխանենք՝ չանձնավորելով և չբաղադրականացնելով հարցը. Հայաստանի Հանրապետության կառավարությունը, անկախ նրանից, թե ով է ղեկավարը, որևէ իրավասություն չունի չեղյալ համարելու կաթողիկոսական ընտրությունն ու օծումը:

Առաջին՝ կաթողիկոսի օծման եկեղեցական ծիսակարգը որևէ աշխարհիկ իշխանություն իրավունք չունի չեղարկելու, քանզի օծել են եպիսկոպոսները, իսկ Տերն ասում է. «Եմարիտ եմ ասում ձեզ, ինչ որ կապեք երկրի վրա, կապված պիտի լինի երկնքում: Եվ ինչ որ արձակեք երկրի վրա, թող արձակված լինի երկնքում» (Մատթ. ԺԸ 18): Ուստի՝ այն, ինչ կապել են եպիսկոպոսները, չեն կարող արձակել աշխարհիկ ղեկավարները:

Երկրորդ՝ Ամենայն Հայոց Կաթողիկոսը համայն հայ ժողովրդի հոգևոր առաջնորդն է, ուստի ոչ ՀՀ կառավարությունը, ոչ ՀՀ բնակչությունը և ոչ էլ Սփյուռքը իրավունք չունեն պահանջելու կաթողիկոսի հրաժարականը. այդ իրավունքը բացառապես պատկանում է Ազգային-եկեղեցական ժողովին:

Երրորդ՝ Ամենայն Հայոց Կաթողիկոսի հրաժարականը կարող են պահանջել միայն բացառիկ դեպքերում, օրինակ՝ եթե կաթողիկոսն ուրացել կամ փոխել է Հայ եկեղեցու դավանանքը՝ հակվելով դեպի քաղեկորմականություն: Խնդիրը բարձրացնում է եպիսկոպոսաց դասը, և որոշումը կայացնում է Ազգային-եկեղեցական ժողովը:

3. Ի՞նչ գիրք է «Կանոնագիրք Հայոց» ժողովածուն:

Մինչ «Կանոնագիրք Հայոց»-ը մի քանի բառով ներկայացնելը մեջբերենք մեր Տեր Հիսուս Քրիստոսի խոսքը՝ «Շաբաթ օրը մարդն համար է, եւ ոչ թե մարդը՝ շաբաթ օրվա համար» (Մարկ. Բ 27): Տերունական խոսքի հիման վրա Հայ եկեղեցու վարդապետները, նաև Դատաստանագրքի հեղինակ Մխիթար Գոշը, ասել են. «Օրենքներն են մարդու համար, ոչ թե մարդը՝ օրենքների»: Այսպիսով՝ մարդը չէ «Կանոնագիրք Հայոց»-ի ծառան, այլ այս ժողովածուն է ստեղծվել մարդուն օգնելու, խրատելու, սխալ վարքից զերծ

պահելու և դեպի ճիշտ ճանապարհ ուղղորդելու համար: Քրիստոնեության նպատակը, առիասարակ, եկեղեցու սահմանած և ընդունած կանոններն ի նպաստ մարդուն գործածելն է, նրան մեղքերից ազատելը, մաքրագործելն ու սրբացնելը և Աստծու արքայության ժառանգորդ դարձնելը:

«Կանոնագիրք Հայոց»-ը երկար դարեր եղել է հայ ժողովրդի և Հայ եկեղեցու հիմնական իրավական ժողովածուն: Այն բովանդակում է և՛ եկեղեցական, և՛ աշխարհիկ կյանքը կարգավորող կանոններ, որոնք հեղինակել կամ սահմանել են Ընդհանրական եկեղեցու հայրերը, Հայոց կաթողիկոսներն ու մշակավոր եկեղեցական գործիչները, ընդհանրական և տեղական ժողովները (որոնց մասնակցել են ոչ միայն հոգևորականներ, այլև ժամանակի իշխաններն ու նախարարները): Ժողովածուն բաղկացած է և՛ թարգմանական, և՛ զուտ հայկական կանոնական բնագրերից:

4. Ի՞նչ սահմանումներ կան «Կանոնագիրք Հայոց»-ում կաթողիկոսի և եպիսկոպոսների կուսակրոն լինելու և կուսակրոնության ուխտը խախտելու վերաբերյալ:

Նախ մշենք, որ «Կանոնագիրք Հայոց» ժողովածուում չկա այնպիսի կանոն, որի համաձայն՝ եպիսկոպոսները և կաթողիկոսը պետք է անպայման լինեն կուսակրոն: Երկրորդ՝ երբեք չպետք է մոռանալ, որ եկեղեցին ոչ թե հավածում է մեղավորին, այլ ունի ապաշխարության խորհուրդ և նախ կոչ է անում ապաշխարելու և մաքրագործվելու:

Այո, «Կանոնագիրք Հայոց»-ում, ի շարս այլ կանոնների, կան այնպիսիները, որոնք վերաբերում են կուսակրոնության ուխտի խախտմանը, և ուխտազանցը՝ լինի կրոնավոր թե միանձնուհի, սարկավագ թե եպիսկոպոս, պետք է ապաշխարի:

Օրինակ՝ Ս. Գրիգոր Լուսավորչի անվամբ հայտնի կանոնախմբի 13-րդ կանոնը ուխտազանց կրոնավորների համար սահմանում է յոթ տարվա ապաշխարություն: Կապաղովկյան հայրերից Գրիգոր Աստվածաբանի անվամբ հայտնի կանոնախմբի 19-րդ կանոնը սահմանում է, որ ուխտազանցը պետք է ապաշխարի՝ վեց տարի եկեղեցու դռնից դուրս լինելով, ապա՝ ևս երկու տարի, երբ կարող է եկեղեցի մտնել՝ առանց Հաղորդությանը մոտենալու:

Կուսության ուխտը խախտողների նկատմամբ խիստ է Հայքում 444 թ. գումարված Շահապիվանի ժողովը: Այս ժողովի առաջին կանոնն ասում է, որ եթե եպիսկոպոսը պղծություն է գործում, շնանում կամ մի ուրիշ վատթար արարք է կատարում, ապա պետք է կարգալույծ արվի: Այստեղ, սակայն, մշենք մի կարևոր հանգամանք, որ որևէ հոգևորականի դեպքում կարգալուծություն կարող է պահանջել եկեղեցու Կարգապա-

հական հանձնաժողովը կամ եպիսկոպոսաց ժողովը:

Քրիստոնեությունը, առիասարակ, խիստ մոտեցում ունի ամբարո վարքագծի հանդեպ (և՛ հոգևորականների, և՛ աշխարհականների, և՛ տղամարդկանց, և՛ կանանց դեպքում), և անընդունելի է ինչպես մարմնով, այնպես էլ մտքով մեղանչելը: Տերունական խոսքը գիտենք՝ «Ամեն մարդ, որ կնոջ նայում է նրան ցանկանալու համար, արդեն շնացավ նրա հետ իր սրտում» (Մատթ. Ե 28): Ուստի, մարմնական մեղքից բացի, մարդուն կորստյան է տանում նաև մտքով մեղանչելը:

Աստծու Որդին մարդացավ՝ իր աստվածային բնությանը միավորելով մարդկային մարմին, հոգի և միտք. «...որով վերցրեց մարմին, հոգի և միտք և այն ամենը, ինչ բնորոշ է մարդուն» (Նիկիական Հավատո հանգանակ), ուստի մարդն էլ պետք է կատարելանա մարմնով, հոգով և մտքով: Գուցե որևէ մեկի մարմնական մեղքը մեզ համար ակնհայտ է, և մենք նրան քննադատենք, իսկ մեկ ուրիշը մարմնապես չմեղանչի և մեզ անմեղ թվա, սակայն միտքը մաքուր չլինի... Միայն Աստված կարող է քննել մարդու սիրտն ու հոգին:

Եվ որ շատ կարևոր է՝ քրիստոնեությունը միմյանց սխալները հրապարակելու և միմյանց քարկոծելու կրոն չէ, այլ սիրո կրոն է, որում սերը սովորական ընկերասիրությունից հասնում է միմեկ խաչելություն: Քրիստոս մեզ պատգամել է. «Պիտի սիրես քո ընկերոջը, ինչպես քո անձը» (Մատթ. ԻԲ 39), իսկ Հայ եկեղեցու սուրբ վարդապետ Ամանիա Նարեկացին ասում է. «Խոնարհություն է, երբ մարդը տեսնում է ընկերոջ սխալը և չի բաժնախոսում, նրան չի դատում, այլ ասում է, թե՛ ես հանցավոր եմ և ուրիշին չեմ կարող դատել»: Եթե աշխարհիկ կառավարությունը տեսնում է խնդիրներ եկեղեցական կյանքում, ապա պետք է այդ մասին բարձրաձայնի՝ փակ ժողով հրավիրելով և բարեկամաբար խոսելով:

5. Վերջին օրերին որոշ անձինք վկայակոչում են Աշտիշատի ժողովը և Անկյուրիայի ժողովի 20-րդ կանոնը՝ ի հաստատումն այն փաստի, որ կաթողիկոսը պետք է լինի կուսակրոն և կուսակրոնության ուխտը խախտելու կամ զավակ ունենալու դեպքում պետք է կարգալույծ արվի:

Սկզբից ևեթ ասենք, որ վերոնշյալ երկու կանոնները որևէ կապ չունեն կաթողիկոսի կամ եպիսկոպոսների կուսակրոն լինելու հետ: Այսպես՝ Հայոց մեջ առաջին եկեղեցական ժողովը տեղի է ունեցել 354 թ. Աշտիշատում՝ Ներսես Մեծ կաթողիկոսի (353–373 թթ.) նախագահությամբ: Այս ժողովի կանոններն ընդգրկված չեն «Կանոնագիրք Հայոց» ժողովածուում և մեզ են հասել Մովսես Խորենացու և Փավստոս Բուզանդի պատմագրերից՝ ընդհանուր նկարագրությամբ: ➔ էջ 5

Եկեղեցիների ոչնչացումը Երևանում խորհրդային բռնապետության օրոք

1920 թ. նոյեմբերի 29-ին Հայաստանի խորհրդայնացումից հետո բոլշևիկյան իշխանության կողմից սկսվեց հակաեկեղեցական, հակակրոնական քաղաքականություն: Եկեղեցին հռչակվեց հակախորհրդային, հակահեղափոխական կազմակերպություն, կրոնը՝ հակախորհրդային զաղափարախոսություն: Նոր իշխանությունները չմոռացան նաև Ամենայն Հայոց Կաթողիկոսի աջակցություը Հայաստանի առաջին հանրապետությանը և անմիջապես անցան հակաեկեղեցական արշավի իրագործմանը:

Հայ հոգևորականության դեմ ծայր առան բռնաճնշումներ, հալածանքներ, մեղադրանքներ, ձերբակալվեցին մի շարք հոգևորականներ, ինչպես՝ Վանի վերջին առաջնորդական փոխանորդ, Վանի ինքնապաշտպանական մարտերի և Սարդարապատի հերոսամարտի մասնակից Եզնիկ վարդապետ Ներկարարյանը, Մայր Աթոռի միաբան Արսեն վարդապետ Ղլտջյանը, Մուղնու վանահայր Խորեն վարդապետ Լազարյանը և ուրիշներ:

Հայաստանում խորհրդային իշխանությունների հակաազգային ճնշումներն ու բռնությունները զնայով ավելի էին ուժգնանում: 1921 թ. փետրվարին դաշնակցականներն ապստամբեցին բոլշևիկյան իշխանության դեմ և մտնելով Երևան՝ ազատեցին բանտարկյալներին, որոնց թվում էին նաև հայ հոգևորականներ: Բոլշևիկների և դաշնակցականների հակամարտության ընթացքում զոհվեցին նաև հայ հոգևորականներ: Սևանի մենաստանի միաբան և Նոր Բայազետի գործակալ Եզնիկ վարդապետ Վարդանյանին բոլշևիկները խեղդամահ արեցին Սևանի լճի սառցահորում՝ համարելով նրան «հակահեղափոխական և դավաճան»:

1921 թ. ապրիլի 22-ից՝ դաշնակցականների ապստամբությունը ճնշելուց հետո, խորհրդային իշխանության հակաեկեղեցական գործունեությունը շարունակվեց ավելի ուժգին թափով և դաժան մեթոդներով:

Շուտով բոլշևիկները Մայր Աթոռից առգրավեցին Էջմիածնապատկան այգիներ. 6-ը՝ Վաղարշապատում, 2-ը՝ Երևանում, 3-ը՝ Աշտարակում, 2-ը՝ Օշականում, 1-ը՝ Փարաքարում:

1930—1931 թթ. Հայաստանում ձերբակալվեցին 46 հոգևորականներ. հակահեղափոխական և հակախորհրդային գործունեության համար նրանցից երկուսը՝ Վայոց Ձորի Հորադիզ գյուղի ծխատեր Տեր Ստեփան քահանա Ավետիսյանը և Խաչիկ գյուղի ծխատեր Տեր Արիստակես քահանա Խաչատրյանը, զնդակահարվեցին:

Հայ հոգևորականների դեմ բռնությունների զագաթնակետը 1936—1938 թվականներն են: Բռնությունների զոհ դարձան 134 հոգևորականներ, որոնցից 82-ը՝ զնդակահարվեցին: Գնդակահարվածների թվում էին Մայր Աթոռի միաբաններ Բագրատ արքեպիսկոպոս Վարդազարյանը, Թադևոս եպիսկոպոս Հարությունյանը և Շիրակի թեմի առաջնորդ Արտակ եպիսկոպոս Սմբատյանը:

1938 թ. ապրիլի 5-ի լույս 6-ի գիշերը Վեհարանի իր ննջասենյակում խեղդամահ արվեց Ամենայն Հայոց Կաթողիկոս Խորեն Ա Մուրադբեկյանը: Խորհրդային Հայաստանի պետքաղվարչության աշխատակիցների կողմից առգրավվեցին և պետականացվեցին Մայր Աթոռի գանձարանում պահվող երկուսուկես կիլոգրամ ոսկին, 16 փուֆ արծաթեղենը և մեծ քանակությամբ թանկարժեք քարեր:

Մարդկային զոհերից բացի՝ Հայ Եկեղեցին կրեց նյութական, բարոյական, պատմամշակութային վնասներ: Դեռևս 1924 թ. հուլիսին Երևանի փոխթեմակալ և Ամենայն Հայոց կաթողիկոսական տեղապահ Խորեն արքեպիսկոպոս Մուրադբեկյանը հայտնում էր, որ Երևանում՝ Սաղովալա (ճերկայումս՝ Հին Երևանցի) փողոցում գտնվող Գեթսեմանի ուխտատեղի-եկեղեցին փակվել է: Շուտով այդ եկեղեցին քանդվեց, և տեղը կառուցվեց Երևանի օպերայի ակադեմիական թատրոնը:

Հայաստանում մոր թափով սկսեցին ավերել վանքերն ու եկեղեցիները: Նորքի Սիմեոն Շերունի եկեղեցին այրեցվեց 1930 թ.: Երևանում սկսեցին խոսել Ս. Պողոս-Պետրոս եկեղեցու նախապատրաստվող քանդման մասին: Այդ ընթացքում Հնությունների պահպանության կոմիտեն կատարում էր այդ եկեղեցու վերակառուցման աշխատանքները: Տեղեկանալով, որ եկեղեցուն վտանգ է սպառնում, մտահոգ ելույթներ ունեցան Հուշարձանների պաշտպանության կոմիտեի նախագահ Ալեքսանդր Թամանյանը և գիտական քարտուղար Աշխարիբեկ Քալանթարը: Նրանք 1930 թ. փետրվարի 6-ին և մարտի 2-ին մամակով դիմեցին Հայաստանի լուսժողկոմ Ա. Եղիազարյանին՝ հայտնելով իրենց մտահոգությունը. «Կոմիտեն տեղեկացել է, որ Երևանի քաղխորհուրդը որոշել է քանդել Աբովյան փողոցում գտնվող Պողոս-Պետրոս եկեղեցին: Կոմիտեն իր պարտքն է համարում հայտնել ձեզ, որ վերոհիշյալ եկեղեցին կառուցված է 1679 թ. մեծ երկրաշարժից անմիջապես հետո: Դա Երևանի ամենահին շենքերից մեկն է, որովհետև երկրաշարժը հիմնովին ոչնչացրել էր քաղաքի բոլոր կառույցները: Բացի դրանից, այն ունի իր վրա բազմաթիվ արձանագրություններ, քանդակներ, պատմական դուռը (Հին Բայազետից բերված) և իր ամբողջությամբ ներկայացնում է 17-րդ դարի հայ ճարտարապետական պատկերը: Նրա կործանումը մի զգալի բաց պիտի առաջացնի Երևան քաղաքի շինարարության պատմության համար: Ուստի և կոմիտեն խնդրում է ձեզ միջնորդել ժողկոմխորհի առաջ թույլ չտալ այդ հուշարձանի քանդումը, մանավանդ որ նրա կանգուն մնալը չի խանգարում նրա շուրջը քաղաքացիական շենքեր կառուցելու Աբովյան փողոցի և հրապարակի կողմից»:

Նույն թվականի փետրվարի 21-ին Ա. Թամանյանին և Ա. Քալանթարին պատասխանեց երքաղխորհրդի նախագահ Գ. Հանեսոլյանը. «Հայտնում ենք, որ Պողոս-Պետրոս եկեղեցու մասին կան բազմաթիվ բանվորական կազմակերպությունների որոշումներ, որոնք

հավանություն են ստացել քաղխորհրդի նախագահության կողմից: Հիշյալ եկեղեցին, ճիշտ է, չի ընկնում քաղաքի հատակագծման տակ, սակայն այդ դեռ չի նշանակում, որ քաղխորհուրդը կարող է հանդուրժել, որ այդ եկեղեցին կանգուն թողնվի իր շրջակայքի կառուցվելիք մոր տների մեջ...»:

Ս. Պողոս-Պետրոսի որմնանկարները գնահատելու համար Մոսկվայից Երևան հրավիրվեց գեղանկարիչ-վերականգնող Գրիգորի Չիրիկովը, որը որմնանկարներին ծանոթանալուց հետո Հայաստանի լուսժողկոմին տեղեկացրեց. «Իմ կարճատև այցելության ընթացքում հայտնաբերվեցին նյութեր և գրականության մեջ հիշատակություններ, որ գեղանկարչության յուղաներկ կերպը այստեղ հանդիպում է արդեն 10-րդ դարի սկզբին: Հավանաբար Արևելքի և մասնավորապես Հայաստանի ձեռագրերի ու գեղանկարչության նյութի խոր ուսումնասիրությունը կհարկադրի փոխել եվրոպական գիտական աշխարհում գոյություն ունեցող կարծիքը յուղաներկ կերպի առաջացման ժամանակաշրջանի մասին և կարևոր ճշտում կմտցնի գեղարվեստական գեղանկարչության մշակույթի ուսումնասիրության մեջ:

....Վերջում ուզում եմ կանգ առնել հենց իր շենքի քանդման, հետևաբար՝ գոյություն ունեցող որմնանկարների փոխադրման հարցի վրա: Ես գտնում եմ, որ դա պահելու պայմանների ցանկացած փոխառության դեպքում կկորսվեն ինչպես ամբողջ գիտական հավաստիությունը, այնպես էլ արժեքավոր տվյալները, որոնցից՝ իբրև գիտական բազայից, աշխարհի գիտնականներն ուսումնասիրության համար նյութ են քաղում:

Պահպանված գեղանկարչությունը վաղմշակած ժամանակաշրջանի, դարերի ընթացքում գոյություն ունեցող եղանակների ուսումնասիրության ուղիների փարոս է, ուստի գտնում եմ, որ շինությունը քանդելու մտքից պետք է մեկընդմիջտ հրաժարվել»:

Բոլշևիկները ոչ մի զնով չէին հրաժարվում եկեղեցին քանդելու իրենց մտադրությունից և սուկ դրա ժամկետը երկարացրին, որպեսզի հանդարտվեն եկեղեցու շուրջը ծագած կրքերը: Իսկ այդ ընթացքում Հուշարձանների պահպանության կոմիտեի մասնագետները շարունակում էին Ս. Պողոս-Պետրոս եկեղեցուն կատարել վերականգնողական աշխատանքներ: Սակայն արդեն 1930 թ. հոկտեմբերին երքաղգործկոմի կոմունալ տնտեսության բաժնի վարիչ Մարտիրոսյանը Հուշարձանների պահպանության կոմիտեին պահանջագիր ուղարկեց. «Նկատի ունենալով, որ զալիք շինեզոնը սկսվելուն պես քանդվում է քաղաքի նախկին Պողոս-Պետրոս եկեղեցին, ուստի խնդրվում է դադարեցնել ձեր կողմից այդ շենքում տարվելիք վերակառուցման աշխատանքները և առանձնացնել ու փոխադրել կառուցվածքներից այն մասերը, որոնք՝ որպես հնություն, որոշ արժեք ունեն ու անհրաժեշտություն են ներկայացնում կոմիտեիդ համար: Ժամկետ՝ 20-ը նոյեմբերի»:

1930 թ. նոյեմբերի 6-ին Երևանի քաղաքային խորհրդի նախագահության նիստում լսվեց Ս. Պողոս-Պետրոս եկեղեցու քանդման հարցը: Երքաղխորհրդի նախագահությունը որոշեց. «Նկատի ունենալով, որ այդ եկեղեցու շենքը չունի ոչ մի ճարտարապետական արժեք, գտնել անհրաժեշտ նրա քանդման աշխատանքները ավարտել»:

1931 թ. Պողոս-Պետրոս եկեղեցու որմնանկարները խնամքով, շերտ առ շերտ տեղից հանվեցին լավագույն մասնագետների ձեռքով, ու եկեղեցին քանդվեց:

Մինչ Ս. Պողոս-Պետրոս եկեղեցու ավերումը մասնագետները կարծում էին, որ այն կառուցվել է 17-րդ դարում՝ հայտնի երկրաշարժից հետո: Սակայն քանդելուց հետո պարզվեց, որ եկեղեցին «իր ներքին մասում դեռևս հարազատորեն պահել է 5-րդ դարի բազիլիկայի առանձնահատկությունները»։ Կործանվեց հնագույն ժամանակներից մեզ հասած և մշակութային-ճարտարապետական ու պատմական կարևորագույն մշանակություն ունեցող մի կառույց:

1937—1938 թթ. Հայաստանի բոլշևիկյան իշխանությունների հաջորդ հարվածն ուղղված էր Երևանի Կաթողիկե եկեղեցուն, որը գտնվում էր Երևանի կենտրոնում: Ինչպես գրել է պատմաբան Կ. Ղաֆադարյանը, «1936 թ. վերջերին Կաթողիկե եկեղեցին ընկնում էր կառուցվելիք շենքերի տեղում: Այդ պատճառով հարց ծագեց նրա քանդման մասին: Սակայն, որպեսզի քանդման ընթացքում որևէ կարևոր բան չփչանա, Երևանի քաղաքային խորհուրդը ՀԽՍՀ պատմության և գրականության ինստիտուտին դիմեց թույլտվություն ստանալու համար: Ինստիտուտը քանդումները չարգելեց, թույլ տվեց, բայց պայման դրեց, որ քանդումները կատարվեն հնագետի ամենօրյա հսկողության ներքո, որպեսզի որևէ կորուստ եկեր չկորչի և չփչանա: Այն ժամանակ վերոհիշյալ կազմի մեջ էր գտնվում նաև Պատմական հուշարձանների պետական մարմինը, որը և տողերիս հեղինակին նշանակեց այդ քանդումների հսկիչ-լիազոր: Մեր պարտականությունն էր օրվա բոլոր ժամերին հետևել քանդումներին, և եթե ի հայտ գային արժեք ներկայացնող բեկորներ կամ շենքի մասեր, ապահովել դրանց պահպանությունը:

Քանդումներն սկսվեցին դեկտեմբերին և տևեցին մինչև հաջորդ տարվա մարտ ամիսը: Այդ քանդումները թեև կրկնակի երկար տևեցին մեր՝ հաճախակի դրած արգելքների պատճառով, բայց Երևան քաղաքին պարզևեցին միջնադարյան մի հուշարձան՝ 13-րդ դարի երկրորդ կեսին պատկանող: Պետք է նշեմ, որ իսկական հայրենասերները, չվախենալով սարսափելի ժամանակներից, դիմադրեցին եկեղեցիները քանդող բարբարոսներին: Եզակի մվիրյալներից էր 20-ական թվականների բռնություններից հրաշքով փրկված Երևանի պետական համալսարանի պրոֆեսոր, հնագետ-պատմաբան Աշխարիբեկ Քալանթարը՝ Արդվի գյուղի Լորիս-Մելիք-Քալանթարների ազնվական տոհմից սերված։ ➔
Էջ 8

Եկեղեցու անկախությունը պետական իշխանության հակազդեցության պայմաններում

➔ Էջ 4

Աշտիշատի ժողովն անդրադարձել է ոչ թե հոգևորականների կուսակրոնության պահպանմանը կամ խախտմանը, այլ Հայաստանում վերական կյանքի կարգավորմանը, ինչը վերաբերում է միանձանք և միանձնուհիներին: Ժողովը սահմանել է վանականների և անապատականների համար կառուցել երեք տեսակի բնակատեղի՝ վանքեր, մենաստաններ և ճգնավորների խցեր:

Անկյուրիայի ժողովը, ինչպես հայտնի է, ունի համաքրիստոնեական մշակակություն: Այն հրավիրվել է 314 թ. Անկյուրիա քաղաքում (Փոքր Ասիա)՝ փաստորեն նախորդելով Նիկիայի՝ 325 թ. առաջին տիեզերաժողովին: 20-րդ կանոնը սահմանում է, որ ուլքեր չա-

փահաս են և կուսակրոնության խոստում են տվել, բայց դրժել են և մեղքի մեջ ընկել, պետք է ապաշխարեն երեք տարի՝ երկու տարի Սուրբ Պատարագի ժամանակ եկեղեցու դռան առջև պիտի լինեն՝ հսկողության ներքո, ևս մեկ տարի էլ ապաշխարողների հետ պետք է դուրս գան բուն Պատարագից առաջ:

Ինչ վերաբերում է այն հանգամանքին, որ որևէ կուսակրոն հոգևորական կարող է զավակ ունենալ, ապա մշեմք, որ ցանկացած երեխայի ծնունդ Աստծու արարչագործության շարունակությունն է, ամեն մի երեխա, երբ լույս աշխարհ է գալիս, Աստված նրան շնորհներ է պարգևում: Ուստի որևէ մեկն իրավունք չունի մեկ ուրիշի կյանքը համարելու սխալ:

Եզրահանգում

Ընդհանրական եկեղեցին՝ այդ թվում Հայ Առաքելական Սուրբ Եկեղեցին, պատկանում է Հիսուս Քրիստոսին. Քրիստոս է Եկեղեցու գլուխը, և եկեղեցական բոլոր ծեսերը կատարվում են Սուրբ Հոգու շնորհներով: Եթե ներեկեղեցական կյանքում կան թերություններ, անշուշտ, հավատացյալ ժողովուրդն իրավունք ունի բարձրաձայնելու և պետք է բարձրաձայնի այդ խնդիրների մասին, սակայն լուծումը պետք է թողնել Աստծուն: Քրիստոսն է ճշմարտությունը, ճանապարհը և կյանքը (Հով. ԺԴ 6), և ցանկացած խնդիր լուծվում է միայն Նրա կամքով: Սուրբ Հոգին է բնակվում Եկեղեցում, քանզի Քրիստոս ասաց. «Իսկ Մխիթարի-

չը՝ Սուրբ Հոգին, որին Հայրը կուղարկի Իմ անունով, Նա ձեզ ամեն բան կուսուցանի եւ ձեզ կիիշեցնի այն ամենը, ինչ Ես ասացի ձեզ» (Հով. ԺԴ 26): Ուստի՝ Սուրբ Հոգին է մաքրագործողը և սրբացնողը, Նրա բաշխած շնորհներով է ամենայն ինչ լուսավոր և բարի դառնում: Եկեղեցու հետ հարաբերություններում պետք է զգոն և ողջախոհ լինենք, որ հանկարծ անզգուշաբար չվիրավորենք Սուրբ Հոգուն. «Ամեն մեղք եւ հայիոյանք կնճրվեն մարդկանց, բայց Հոգու դէմ հայիոյանքը չպիտի ներվի» (Մատթ. ԺԲ 31):

Գևորգ սրկ. ՂՈՒՇՅՅԱՆ, պ. գ. ք. Լուսիկն ԹՈՒՄԱՆՅԱՆ, պ. գ. ք.

Անգետ Թագավորը

Երբևէ լսել եք անգետ թագավորի, Անգետների թագավորության մասին: Ժամանակին դա մի ուսմաշափ պետություն էր՝ օվկիանոսից այն կողմ, որտեղ ոչ գիրք էին կարդում, ոչ հարց էին տալիս, ոչ էլ մտածում: Այստեղ բոլորը մի հին մշակմաբան ունեին. «Ով շատ է մտածում, խելքահան է լինում»:

Թագավորության ղեկավարն էր Անպատասխանը: Նա գահին էր բազմել, քանի որ կարողացել էր ամեն հարցի պատասխան տալ՝ առանց մի բան իմանալու: Երբ նրան հարցնում էին՝ ի՞նչ եղանակ է վաղը լինելու, պատասխանում է. — Արև կլինի, եթե, իհարկե, անձրև չգա:

Իսկ ներկաները զարմանքով ու բավականությամբ զլուխները տարուբերում էին:

Երբ հարցնում էին՝ ե՞րբ կլինի արևի խավարում, ասում է.

— Առաջիկա հարյուր տարվա ընթացքում, թեև շատերն այն չեն տեսնի: Բայց իմացած եղեք, որ արևը միշտ էլ արևելքից է դուրս գալու և քուն է մտնելու արևմուտքում:

— Մեր թագավորն իմաստուն է,— բացականչում էր ժողովուրդը:

Մի օր մի ուրիշ թագավորությունից՝ Գիտության երկրից, նրանց առաջարկեցին համագործակցել՝ գրքեր ուղարկել, դպրոցներ հիմնել, որպեսզի վերջիններս էլ ըմբռնվեն գիտության քաղցրությունում ու առավելությունները: Բայց Անպատասխանի պալատում խորհուրդ գումարեցին, և որոշվեց.

— Գիտելիքը վստահավոր է: Այն հարցեր է առաջացնում, իսկ մենք բոլոր հարցերի պատասխաններն արդեն ունենք:

Թագավորությունում հայտնված գրքերն այրվում և անիծյալ էին հռչակվում: Բայց բոլոր նրանք, ովքեր գաղտնի պահեցին իրենց հասած գրքերն ու կարողացան կարդալ, ժամանակ անց մեկնեցին Գիտության երկիր՝ դառնալով հայտնի մարդիկ ու մշակավոր գիտնականներ: Իսկ Անգետների թագավորությունում ժամանակը կարծես կանգ էր առել:

Անպատասխանը շարունակում էր գահին նստած կառավարել ու ասել.

— Ով շատ մտածի, խելքահան կլինի, ով շատ կարդա, կխելազարվի:

Եվ ժողովուրդը դարձյալ բավականացած զլուխը շարժում էր.

— Ահա իմաստուն մի թագավոր...

Փայտի կտորը

Աշնան հով էր փչում սարերից: Բոխու մթին ամառները ծփում էին, տերևները՝ համգռում թավշե խաշամի մեջ: Գյուղի եզերքում, ուր դաշտը լեռան էր հենվում, ապրում էր այգեգործ Սանասարը: Նրա ծառերի մեղմանուշ բույրը հասնում էր մինչև հարևան Բաղդասարի բակը:

Մի օր, երբ Սանասարն իր այգին մտավ, տեսավ, որ խնձորները հողին են, դեղձենին՝ վնասված, հողը՝ տրորված ու ոտնահարված: Ինչպես մեղավորը խոստովանությունից առաջ, նա կանգնեց երկար, աչքերի մեջ՝ մութ: Ո՛չ լաց եղավ, ոչ աղաղակեց: Միայն վերցրեց փայտի հաստ կտորը մացառների տակից ու քայլեց դեպի Բաղդասարի տուն: Գյուղի շները լուռ էին: Միայն քամին էր, որ շարունակում էր այս ու այն կողմ տանել նրանց վաղեմի հաչը:

Բաղդասարը բացեց տան դուռն ու... չհասցրեց հասկանալ, թե ինչպես վայր ընկավ: Հետո ցավից պարզ դարձավ, որ ճակատին հարված է եղել:

Հետայնու գյուղը երկատվեց. լռությունը զենք դարձավ: Մեկի տունն այրեցին, մեկի այգին ապականեցին, մեկի ջրաղացը խորտակեցին...

Միայն Գագիկ պապն էր, որ այս ամենին չէր խառնվում՝ հին թեմու տակ նստած, իր ամենօրյա հացը բաժանելով շան հետ:

Վերջապես մի օր, կանչելով երկուսին էլ, ասաց.

— Ախպեր,— դու քո ձեռքով այգի ես տնկել, նա իր ձեռքով պատ է դրել: Բայց այգին ո՞վ է քանդել, գիտե՞ք...

Լռեցին: Պապը լուռ մայեց սարերին:

— Խոզ էր մտել, քաղցած, վայրի խոզ: Գիշերվա կեսին, սարից իջած: Ես տեսա՝ ո՞նց փորփրեց: Բայց չէի հասցնի ասել ու հետո էլ չհասցրի...

Արևը մայր էր մտնում: Սրաթև թխկիի տերևները դանդաղ թափվում էին: Ոչ մեկը չէր խոսում: Բաղդասարն աչքերը հառել էր հողին, իսկ Սանասարը փայտի կտորը մի կողմ էր օգել:

Գյուղի շները լուռ էին: Միայն քամին էր անցնում հին թեմու միջով ու կարծես ինչ որ բան էր շշմշում...

Արծիվն ու թութակը

Մի թագավոր շատերի պես ցանկացավ պալատում թռչուն ունենալ: Բերել տվեց գեղազեղ տեսքով, հզոր թևերով, վիթխարի մի արծիվ և ամենուր նրան իր հետ էր վերցնում: Մի անգամ նա արծիվն հրամայեց.

— Ասա՝ ո՞վ է իմ երկրում ամենախելացին:

Արծիվը պատասխանեց.

— Նա, ով կարողանում է տեսնել իր սխալը:

— Ո՞վ,— չլսելու տալով՝ կրկին դարձավ թագավորը:

— Նա, որ անմիջապես անդրադառնում է իր սխալին և դաս է քաղում:

Թագավորը թեև ժպտաց, բայց այնքան էլ գոհ չմնաց պատասխանից:

— Մխալ պատասխան ես տալիս,— որոշ դադարից հետո անդրադարձավ նա,— ասա՝ ո՞ր թագավորն է ամենախելացին:

Արծիվը լուռ էր:

— Այդ դեպքում,— դարձյալ վրա բերեց թագավորը,— կարո՞ղ ես ասել՝ ո՞վ է ամենազեղեցիկը:

— Ով ներդաշնակության և ճշմարտության մեջ է ապրում,— կրկին խրոխտ պատասխանեց արծիվը:

— Ամենազամուռ...

— Ով իշխում է իր ցանկություններին, գիտակցում է իր ընտրու-

թյունն ու չի խուսափում պարտականությունից:

Դրանից հետո թագավորը լռեց՝ ընկնելով մտասնեռումների մեջ, ու տևական ժամանակ այլևս արծիվի հետ չէր զրուցում:

Ժամանակ անց պալատ բերեցին մի թութակ: Թագավորը նրանից էլ հետաքրքրվեց.

— Ո՞վ է ամենախելացին:

Թութակն անմիջապես արձագանքեց.

— Թագավորն է, թագավորը:

— Իսկ ամենազեղեցիկը:

— Թագավորն է, թագավորը,— հետևեց նույն պատասխանը:

Թագավորն ուրախացավ ու ծափահարեց:

Հաջորդ օրը՝ լուսաբացին, արծիվը բացեց իր հուժկու թևերը, սավառնեց երկինք ու այլևս չերևաց հորիզոնում, իսկ թութակն ինքնակամ գնաց և մտավ նրա վանդակը:

Հետագիծ

Ժամանակին Հայոց աշխարհի գեղադիր լեռնալանջերից մեկում մի չքմաղ մենաստան կար՝ աղոթասեր վանականներով ու գիտուն գրիչներով, որոնք օրն ի բուն աղոթում, աշխատում ու պահպանում էին մարդկության ու ժամանակի հարգանքը վաստակած լիառատ սրբությունները:

Մենաստանում մի ծեր վարդապետ կար՝ Անանիա անունով, որին բոլոր եղբայրներն անխտիր հարգում էին իմաստուն ու խոնարհ հոգու համար:

Մի օր մենաստանի դուռը բախեց մի ճամփորդ՝ մաշված համդերձներով, հոգնաբեկ, աչքերում՝ ցավ ու անհուսություն:

Անանիան մոտենալով՝ հարցրեց.

— Որտեղից ես գալիս, որդյակ:

— Ես շատ ճանապարհներով եմ անցել,— պատասխանեց անծանօթը,— բայց ոչ մի տեղ խաղաղություն չեմ գտել:

— Իսկական խաղաղությունը ներսից է գալիս, երբ մարդ գործում է ողջամտորեն՝ փորձելով ճանաչել իրեն ու շրջապատող աշխարհը: Բայց դրա մասին ավելի

մանրամասն հետո կզրուցենք: Հիմա ներս անցիր...

Վանականները ճամփորդին ընդունեցին հարազատորեն՝ տալով կերակուր, ըմպելիք ու մի փոքրիկ կացարան: Բայց ամեն գիշեր, երբ նա քայլում էր մենաստանի բակում, Անանիան նրա քայլերի մեջ ինչ-որ անօրինակ ծանրություն էր զգում:

Մի օր, երբ ճամփորդը նստած էր այգում, Անանիան մոտեցավ ու ասաց.

— Քո ոտքերն այնքան ծանր են, որ հողն է անգամ ցնցվում: Ի՞նչ բեռ ես կրում քեզ վրա:

Ճամփորդը գերադասեց լռել, բայց քիչ հետո ասաց.

— Մի ժամանակ մեծ մարդ էի՝ մեծավորների հետ ու նրանց կողքին: Բայց հարստությունից ու հպարտությունից կուրացա... և արդարի վնասեցի... Հետո հեռավոր լեռները եկա՝ մտածելով, թե այստեղ խաղաղություն կգտնեմ: Բայց իմ թողած հետագիծը գիշերվա հողմի պես հետապնդում է ինձ:

Անանիան մի պահ լուռ փակեց աչքերը, ապա ասաց.

— Ոմանց համար խաղաղություն ուժի և զորության կիրառումն է, ոմանց համար՝ հոգևոր վերելքը, կամ՝ հաշտությունը, կամ՝ լուսավորությունը: Իսկական խաղաղություն այլ կերպ չի լինում, եթե ոչ խոնարհությամբ, մարդասիրությամբ և աստվածասիրությամբ, իրավունքի և արդարության պահպանումով: Քեզ թվում է, թե մարդու թողած հետքը հողի, այնինչ՝ հենց իր մեջ է:

Ճամփորդը լուռ էր: Հետո ակամայից ծնկները ծալվեցին...

— Հիմա ինչպե՞ս պիտի վարվեմ, վարդապետ:

Վարդապետը ժպտաց.

— Քո հետագիծը հիմա շիտակ չէ, բայց եթե փորձես դարձյալ քայլել այնտեղից, որտեղից որ խաղաղությունը ընդհատվել է, մարդկանց և Աստծու հետ ապրես ճշմարտությամբ ու հաշտությամբ, հետագիծը, որ հիմա բեռ է դարձել, կանուրջ կդառնա...

Իսահակ վարդապետ ՊՈՂՈՍՅԱՆ

Երաժշտության զարգացումը սուրբգրային ժամանակաշրջանում

Աստվածաշնչյան ժամանակաշրջանի մասին մեր գիտելիքները հիմնականում հիմնված են Աստվածաշնչի գրական իղումների և հետախույզածաշնչյան աղբյուրների վրա: Կրոնի և երաժշտության պատմաբան Հերբերտ Լոքերը գրում է, որ երաժշտությունը (թե՛ վոկալ, թե՛ գործիքային) դարերի ընթացքում լավ զարգացած է եղել եբրայեցիների, Նոր Կտակարանի ժամանակաշրջանի քրիստոնյաների և քրիստոնեական եկեղեցու շրջանում: Հին Կտակարանին անդրադարձնելով բացահայտում է, թե ինչպես է Աստծո ժողովուրդը նվիրված եղել երաժշտության ուսումնասիրությանը և կիրառմանը, որը յուրահատուկ տեղ է զբաղեցնում պատմական և մարգարեական գրքերում, ինչպես նաև Սաղմոսարանում:

Կրոնական ծիսակատարության երաժշտությունն առաջին անգամ օգտագործել է Դավիթ թագավորը. նրան է վերագրվում Դևիի ցեղի տղամարդկանց՝ Աստծուն երաժշտությամբ ծառայելու պահապաններ համարելը: Պատմաբան Իրեն Հեսկը նշում է, որ Հին Կտակարանի երեսունինը գրքերից Սաղմոսաց



Դավիթ թագավոր-սաղմոսերգու, Երուսաղեմ, ձեռ. 1925: Աստվածաշունչ, 1269 թ., երգնկա

գրքի 150 սաղմոսները, որոնցից շատերը վերագրվում են Դավիթ թագավորին, ծառայել են որպես հրեա-քրիստոնեական հիմնագիտության հիմք՝ եզրակացնելով, որ արևմտյան քաղաքակրթության մեջ ոչ մի այլ պոետիկ ստեղծագործություն այդքան հաճախ երաժշտության համար չի գրվել:

Հնագիտական և գրավոր տվյալները հստակ ցույց են տալիս, որ երաժշտությունը Հին Իսրայելում առօրյա կյանքի անբաժանելի մասն էր: Արձանիկներն ու պատկերագրական ժառանգությունը վկայում են, որ մարդիկ նվագում էին թմբուկներ, և որ մարդկային ձայնը ևս կարևոր էր, երբ կանայք և տղամարդիկ երգում էին սիրային երգեր, մահացածների համար՝ ողբեր: Առկա տվյալները նաև ներկայացնում են երաժշտության և պարի բացօթյա տեսարաններ՝ երբեմն մարգարեական խելահեղություններով, հաճախ նվագախմբով և խորեոգրաֆ երաժիշտներով ու երգիչներով:

Հին երաժշտության պատմաբան Թեոդոր Բուրգի խոսքով՝ «Եթե մենք կարողանայինք մտնել... աստվածաշնչյան ժամանակաշրջան, մենք կգտնեինք երաժշտությամբ լի մշակույթ... որտեղ մարդիկ օգտագործում էին երաժշտություն իրենց առօրյա կյանքում»: Նման երաժշտությունը կարող էր արտահայտել տրամադրությունների և զգացումների մեծ բազմազանություն, ուրախության և տխրության, հույսի և վախի, հավատքի և կասկա-

ծի ընդգրկում հակադրություններ: Իրականում զգացմունքների յուրաքանչյուր երանգ ու որակ կարելի է գտնել երգերի և սաղմոսների հարստության և ժողովրդի բազմազան մեղեդիների մեջ:

Հին հրեաների ամենակարևոր երաժշտական ներդրումը հավանաբար ծիսական երաժշտության կարգավիճակի բարձրացումն էր՝ զուգորդված ծիսական արարողությունների հետ: Երաժշտա-ծիսական կազմակերպվածության վկայությունն են Սողոմոն թագավորի տաճարի նկարագրական պատմությունները, որոնց համաձայն՝ Տաճարում առկա էր 288 երաժիշտները բաղկացած 24 երգչախումբ:

Չնայած հրեաների կողմից կիրառվող գործիքներն օգտագործվում էին նաև հարևան մշակույթներում, այդ թվում՝ Փյունիկիայում, Եգիպտոսում, Ասորեստանում և Հունաստանում, ճշգրիտ կլինի ասել, որ երաժշտության հատուկ սրբազան և աշխարհիկ, բարոյական ու գեղագիտական կիրառություններում հին հրեական երաժշտությունն է յուրահատուկ ներդրում ունեցել:

Երաժշտության պատմաբան Ջոն Սթենները նշում է, որ Աբրահամի և քանաքացիների միջև ավելի վաղ հարաբերություններն ամենայն հավանականությամբ

ազդել են հրեական երաժշտության զարգացման վրա, որը հավանաբար ստիպել է Աբրահամի սերունդներին որոշակի քանակությամբ երաժշտական գործիքներ տեղափոխել Եգիպտոս: Նա ավելացնում է, որ չորս դար մնալը «այնպիսի քաղաքակիրթ մշակույթում, ինչպիսին Եգիպտոսն է, մեծապես նպաստել է նրանց՝ արվեստի վերաբերյալ գիտելիքների զարգացմանը»:

Ա Մնացորդաց 25:1–31-ում թվարկված և ներկայացված են այն հմուտ երաժիշտները, որոնք պետք է կատարեին կամ «մարգարեանային» ծնծողներով, տավիղներով, քնարներով Տաճարի ծառայությամբ:

Չնայած Սաղմոսների և Աստվածաշնչի մյուս գրքերի հին երաժշտությունը (դրանք բոլորը երգվում էին) հաճախ համարվում է կորած, եբրայերեն Աստվածաշնչի մասորեթական բնագիրը պարունակում է երգեցողության մշաններ, որոնք ցույց են տալիս բառերի մեղեդային գիծը: Հետևելով ֆրանսիացի հնագետ Սյուզան Վանտուրային՝ որոշ մասնագետներ այժմ պնդում են, որ այս երգեցողության մշանները թվագրվում են Առաջին տաճարի ժամանակներին և արձանագրում տաճարում երգվող երաժշտությունը: ➔ էջ 7

Երաժշտության զարգացումը սուրբգրային ժամանակաշրջանում

← էջ 6

Փորձեր են արվել դրանք վերանայել ժամանակակից երաժշտական նոտագրությամբ:

Տաճարի երաժշտական ավանդույթները խզվեցին Առաջին տաճարի ոչնչացման և հրեաների՝ դեպի Բաբելոն աքսորի պատճառով Ք. ա. 6-րդ դարում: Սաղմոսների մեծ մասը գրվել է հրեաների՝ Երուսաղեմ վերադառնալուց հետո: Այդ ժամանակ նույնպես, ըստ երևույթին, տարածում է գտել երգչի և ժողովրդի միջև անտիֆոնային երգեցողության փորձառությունը:

Հին Իսրայելի երաժշտությունը ներկայացնում է գրեթե տասնչորս դարերի փոփոխություն՝ մոտավորապես Ք. ա. 1300 թվականից մինչև Ք. հ. 70 թվականը, երբ տեղի ունեցավ Տիտոսի կողմից Երուսաղեմի պաշարումը: Սթեյները նշում է այս ժամանակահատվածում բազմաթիվ արտեֆակտների բացակայությունը: Նա եզրակացնում է, որ «հրեաներին վերաբերող ազգային հուշարձանների տխուր բացակայությունը զարմանալի չէ, երբ հիշում ենք, որ Երուսաղեմը մոտ տասնյոթ պաշարման է ենթարկվել, որոնցից յուրաքանչյուրն ուղեկցվել է ավելի կամ պակաս ավերածություններով, և դա նույնպես հաղթողների ձեռքով, որոնք կարծես չարամիտ հաճույք էին ստանում նվաճված ազգային առանձնահատկությունները ջնջելուց»:

Սակայն Առաջին տաճարի անկումից հետո, ինչպես նշում է

Վերները, հրեական նախաքսորական երաժշտությանը վերադառնալու հրեաների երաժշտական փորձերը ներառում էին հիշողություններ, տեսիլքներ և ֆանտազիաներ, մասնավորապես զարգացնելով ընդհանուր շարժումները ընդհանուր շարժումներում: Վերները պարզապես չէր համարում, որ ժամանակակից ռաբբիները շարունակում են զովաբանել տաճարի գործիքային երաժշտությունը, բայց այսօր արգելում են ցանկացած գործիքային երաժշտություն իրենց սինագոգներում:

70 թվականին Երկրորդ տաճարի ավերումը հանգեցրեց հրեական ազգի փլուզմանը և հրեական սփյուռքի (ցրման կամ քսորի) սկզբին դեպի այլ երկրներ, ինչպիսիք են Իսպանիան, Իտալիան և Հնդկաստանը: Այս վայրերում սինագոգը փոխարինում է ավերված տաճարին՝ ծիսական մորարարություններով, աղոթքներով և ռաբբիական գրություններով, որոնք ուղղված են ինչպես տաճարի, այնպես էլ անձնական ազատության կորուստը սգալուն:

Հին Իսրայելի երաժշտական ավանդույթը շաղկապվում էր միջազգային այլ երկրների մշակույթ-

ներին, ինչպես՝ եգիպտականին և շումերականին: Եգիպտականը Մերձավոր Արևելքի ամենահին մշակույթներից էր և ուներ զարգացած բարձր երաժշտական արվեստ, որը թվագրվում է Ք. ա. մոտ 3000 թ.: Սակայն եգիպտական աղբյուրները ներառում են միայն պատկերազարդ մասունքներ, որոշ գործիքներ և մի քանի գրական գրառումներ, որոնք վերաբերում են կատարողական փորձին: Պահպանվել են կրոնական արարողություններին և հասարակական զվարճանքներին մասնակցող քնարահարների և ֆլեյտահարների բարձրաքանդակներ:

Եգիպտոսում օգտագործվել են մի շարք գործիքներ, այդ թվում՝ քնարը (տավիղի տեսակ), ասիական տարբեր թմբուկներ, սիստրումը: Հայտնաբերվել են նաև որմնակարներ, որոնք պատկերում են երգիչների և գործիքավորողների լույսերը: Երաժշտության պատմաբան Հոմեր Ուլրիխի կարծիքով՝ հավանական է, որ Եգիպտոսն ազդել է հունական երաժշտության կրթական և բարոյական կողմերի վրա: Սթիվեն Բատտլը նկատել է, որ երաժշտությունը պատմական կապ ունի արարչագործության շարժման հետ, երբ օդում թռչում են ձայներ էին արձակում, որոնք կարելի է համարել երաժշտություն:

Չնայած գրառումները քիչ են, հայտնի է, որ Ք. ա. 3000-ից 2300 թթ. Շումերում և Բաբելոնում, որոնք Միջագետքի ամենահին

մշակութային վայրերն էին, գոյություն է ունեցել կազմակերպված տաճարային երաժշտություն՝ երգիչներով: Պեղումները բացահայտել են մի քանի երաժշտական գործիքներ, այդ թվում՝ տավիղներ, քնարներ, կրկնակի հոբոյներ և այլ գործիքներ: Եբրայեցիների և բաբելոնացիների, ասորեստանցիների և խեթական կայսրության սեմական մյուս ազգերի միջև քաղաքական փոխհարաբերությունների բերումով նրանց ազգային երաժշտական ժառանգության մեջ կային նմանություններ:

Շատ քիչ բան է հայտնի մաս կաղերքիստոնեական երաժշտության մասին, քանի որ ինչպես հին երաժշտության մեծ մասը, այնպես էլ այդ շրջանի երաժշտությունը հնչյունագրված չէին և սերնդեսերունդ փոխանցվելու զուգընթաց դրանք շատ տարբերվեցին բնօրինակից: Այնուամենայնիվ, այս վաղ երաժշտության մեծ մասն իր գեղեցկությունն ստացել է հունականից, իսկ սրբությունը՝ եբրայականից: Եբրայական երաժշտությունն ուղղակի և անմիջական ազդեցություն է ունեցել վաղքրիստոնեական եկեղեցու երաժշտության վրա: Եբրայական և քրիստոնեական երգեցողության միջև կապերը գիտականորեն ուսումնասիրվել և ապացուցվել են:

Ղևտաջիների՝ տաճարի երաժշտության երաժշտական արվեստը կորել է 1-ին դարի վերջին: 70 թ. Տիտոս կայսեր զորքերն ավե-

րեցին Երկրորդ տաճարը, իսկ հաջորդ տարիներին ղևտաջիները հրեաների մեծամասնության հետ միասին փախան Հրեաստանից: Ի վերջո ցրված սինագոգի երաժշտությունը կորցրեց տաճարի ուրախ բնույթը, և գործիքային մեծ ուժերը վերացան:

Ըստ Հովսեփոս Փլավիոսի՝ Առաջին տաճարի բոլոր մանրամասները՝ ներառյալ նրա երաժշտական գործիքները, պատրաստվել և դիտվել են որպես տիեզերքի խորհրդանշներ, հատկապես այնպիսի գործիքներ, ինչպիսիք են տավիղը ու քնարը:

Նոր Կտակարանը գրվել է այն ժամանակ, երբ երաժշտությունը շատ ավելի բարձր զարգացման էր հասել: Այնուամենայնիվ, երբեք Վվետարաններում դրան քիչ հղումներ կան: Ղուկասի Ավետարանում՝ «Հրեշտակների երգը», Մարիամի «Մեծացուցե՛ք» և Ջաքարիայի օրհներգությունը: «Գործք առաքելոց»-ում Պողոսն ու Շիդան երգում են բանտի ճաղերի հետևում: Բանտը ցնցվում է, դռները բացվում են, և նրանք ազատ են: Նամակներում երաժշտությանը քիչ են հղումներ արվում, բայց եփեսագիներին ուղղված նամակում Պողոսը հորդորում է եկեղեցիներին՝ երգել սաղմոսներ և հոգևոր երգեր:

Շարունակելի

ՕՖելյա ԳԱՄԱՐՅԱՆ
Նաթել սրկ. ԳԱՄԱՐՅԱՆ

Եսայի՝ Հին Կտակարանի ավետարանիչը և խղճի կենդանի ձայնը

Մարդկության պատմության մեջ կան անուններ, որոնք դարձել են խղճի ձայներ՝ չանցելով վերջի դարերի խորքում: Եսայի մարգարեն այդ կենդանի ձայներից մեկն է: Նա ապրել է գրեթե երեք հազար տարի առաջ՝ պատերազմների, ճգնաժամի, դաժան բարքերի և կռապաշտության դարաշրջանում: Եսային պարզապես հոգևոր առաջնորդ չէր. իր ժողովրդի արդար խղճի ձայնն էր: Նա ճշմարտությունն էր ասում թագավորներին՝ նրանց աչքերին ուղիղ մայելով, կանխատեսում էր աղետներ, կոչում ապաշխարության և ամենակարևորը՝ աշխարհին հույս ավետում, հույս՝ Մեսիայի, մորթված մարդկության և արդարության թագավորության:

Ո՞վ էր այս մարգարեն, որին անվանում են Հին Կտակարանի ավետարանիչ, և որի խոսքերը մեջքերում է հնքը՝ Հիսուս Քրիստոս: Ինչո՞վ են նրա խոսքերն արդիական 21-րդ դարում: Ինչո՞ւ արժե ունկնդրել Եսայու ձայնը՝ ոչ թե սնահավատության վախից ելնելով, այլ ճշմարտության ծարավից:

Եսայի մարգարեն ծնվել է Ք. ա. 770 թ. կամ ըստ այլ տեսակետների՝ Ք. ա. 765 և 760 թթ. միջև: Սերում էր Հուդայի ցեղից և բնակվում Երուսաղեմում: Իր իսկ հիշատակմամբ՝ ոմն մարգարեուհու հետ ամուսնությունից ունենում է երկու երեխա (Ես. Ը 3): Վստահաբար պատկանում էր իր ժամանակաշրջանի կրթված մարդկանց դասին, ինչը երևում է նրա խոր աստվածաբանական գաղափարներից, վարդապետական մտքի ընդարձակությունից և խոսքի հմուտ կիրառությունից:

Եսային մարգարեական պաշտոնին կանչվում է մի ցնցող տեսիլքից հետո (Ես. Զ 1), որը նրան հաղորդ է դարձնում Աստծու փառ-

քին ու սրբությանը և վճռորոշ դառնում նրա հետագա հոգևոր կյանքի համար:

Եսայու գրքի թեման վերաբերում է ճշմարտության վարդապետությանը, համաձայն որի՝ փրկությունն Աստծու շնորհի է, այլ ոչ մարդկային ձեռքբերում: Մարգարեն դա պատվիրում է իր գրքի առաջին մասում՝ քարոզելով, որ հուդայական ազգը մաքրագործվելուց հետո կփրկվի Աստծու գթասրտության շնորհիվ, և զարգացնում է այդ միտքը գրքի երկրորդ մասում՝ հիշատակելով Մեսիայի անձը՝ որպես այդ փրկության օժանդակողի:

Եսայու գիրքը բաղկացած է 66 գլխից և իր ծավալով Հին Կտակարանի, ինչպես նաև ողջ Սուրբ Գրքի ամենամեծ գիրքն է: Եսայու գիրքը Հին և Նոր Կտակարանները կապող օղակ է: Նրանում առկա մարգարեությունները հեշտությամբ կարելի է բաժանել երկու հիմնական մասի: Առաջինը վերաբերում է հուդայական պետության մոտալուտ կործանմանը և ժողովրդի գերությանը դեպի Բաբելոն, իսկ երկրորդը՝ բաբելոնյան գերությունից վերադարձին և Երուսաղեմի գալիք փառքին:

Նոր Կտակարանը Եսայու գրքից ավելի շատ է մեջքերումներ անում, քան Հին Կտակարանի ցանկացած այլ գրքից: Հիշատակվում է մոտ հարյուր հատված. կենդանի կայացվում է բառացի: Անշուշտ, սրանցից շատերը վերաբերում են Եսայի մարգարեին: Նրան հիշատակելու այս հաճախականությունը բացատրվում է այն հանգամանքով, որ Հիսուսն անձամբ կարդում է նրա գիրքը և դրանից հատվածներ օգտագործում



Եսայի մարգարե, Երուսաղեմ, ձեռ. 2563, Կեռան թագուհու Ավետարան, 1272 թ.

հրեաների հետ գրուցելիս. «Նրան տվին Եսայի մարգարեի գիրքը... Գիրքը բացեց, գտավ այն տեղը, ուր գրված էր. «Տիրոջ Հոգին Ինձ վրա է, որա համար իսկ օծեց Ինձ» (Ղուկ. Դ 18): Բացատրվում է նաև նրանով, որ Նոր Կտակարանը Եսայու մարգարեությունների վրա է հիմնում իր գլխավոր վարդապետությունը, որ վերաբերում է Հիսուս Քրիստոսի՝ մարդկության Փրկչի գալուստյանը և Նրա քավչական գոհաբերությանը:

Եսային է այն մարգարեն, որ ամենից շատ է մարգարեացել, կանխատեսել Քրիստոսի մասին, այն աստիճան, որ կոչվել է նախաավետարանիչ կամ ավետարանիչ մարգարե: Դիցուք՝ նա է ասողը. «Ահա կույսը կողիման և մի Որդի կծնի, և Նրա անունը Եմանունը կլինի» (Ես. Է 14): Եսայի մարգարեի գիրքն անվանում են Հինգերորդ Ավետարան:

Մարգարեի գրությունները բավական հետաքրքիր մյուս են ուսումնասիրության համար, որոնց դիպուկ բնութագրություն է տվել Ալեքսանդր Մենը՝ նշելով, որ

դրանք առանձնանում են բարձր գրական արժեքներով, ժանրերի բազմազանությամբ և պատումի լեզվի հարստությամբ:

Եսայու գիրքը պատգամների օվկիանոս է Աստծու, արդարության, մեղքի, կրոնի և ընկերային շատ ուրիշ հարցերի մասին: Իր մարգարեական ծառայության տարիների ընթացքում Եսային շարունակ ենթարկվում էր հալածանքների, և միայն բարեպաշտ եգեկիա թագավորի օրոք էր, որ նա պատիվ էր վայելում և նույնիսկ արքայի մեծավոր խորհրդակցան էր:

Սուրբ Եսայի մարգարեի կյանքն ավարտվում է նահատակությամբ: Ըստ եկեղեցական հնագույն ավանդության՝ նահատակվել է Մանասե ամբարիշտ թագավորի հրամանով՝ սղոցվելով: Ժամանակակից աշխարհի աղմուկի, անհամազստությունների, պատերազմների, սոցիալական ցնցումների և հոգևոր ճգնաժամի պայմաններում մենք հաճախ որոնում ենք մի խոսք, որն ավելի ուժեղ կլինի, քան ժամանակը, մի խոսք, որը ոչ միայն կոգեմշի, այլև ճանապարհ ցույց կտա: Եվ այդպիսի խոսք գտնում ենք Եսայու մարգարեության գրքում. հնագույն բնագիր, որ լցված է մարգարեական զարմանալի ուժով և հոգևոր խոր իմաստությամբ:

Եսայու ձայնը որոտի նման էր. մերկացնում էր սուտը, կոչ էր անում ապաշխարության և միաժամանակ հիշեցնում՝ Աստված չի լքում Իր ժողովրդին նույնիսկ ամենախավար օրերին: Միթե սա արձագանք չի գտնում մեր իրականության մեջ:

Այսօր, երբ բախվում ենք չարի մոր դրսևորումների՝ պատերազմ-

ներ, աղքատություն, հոգևոր անտարբերություն, ընտանեկան արժեքների քայքայում և այլն, Եսայի մարգարեի ձայնը հնչում է այնպես, կարծես նա խոսում է մեզ հետ ուղղակի, դեմ հանդիման:

«Վա՛յ նրանց, որոնք չարին ասում են բարի և բարուն՝ չար, որոնք խավարը լույսի տեղ են դնում և լույսը՝ խավարի, որոնք դառնում են քաղցրի տեղ և քաղցր՝ դառնի» (Ես. Ե 20): Այս խոսքերը կարծես հենց մեր ժամանակների համար գրված լինեն, երբ բարոյական չափանիշները հաճախ մոռացության են մատնվում կամ խեղաթյուրվում:

Եսայի մարգարեի գիրքը միայն ազգերի ու ճակատագրերի մասին չէ: Այն ուղղված է յուրաքանչյուր մարդու, յուրաքանչյուրիս կոչ է անում խորհել և ինքնաքննել՝ իսկ ինչ կա իմ մեջ, պատրաստ եմ դառնալ ուրիշների համար լույս, ապրում են հավատքով, հույսով և սիրով:

Եսայի մարգարեի գիրքը պարզապես Սուրբ Գրքի մի հատված չէ: Դա կենդանի ձայն է, որը խոսում է այսօր մեզ հետ: Նրա տողերում կան և՛ Աստծու արդարությունը, և՛ չարիքի հանդիմանումը, և՛ մարդու հանդեպ խոր կարեկցանք ու հույս: Սա այն գիրքն է, որ արժե կրկին ու կրկին ընթերցել այս անհամազստ օրերին՝ ճշմարտության և լույսի ճանապարհի որոնումներում:

Թող Եսայու խոսքերը չմնան միայն հնագույն գրքի էջերում, այլ կենդանանան մեր գործերում, մեր հավատքով և սիրով:

Եսայի մարգարեին Հայ եկեղեցին հիշատակում է Վարդավառի տոնին հաջորդող հինգշաբթի օրը:

Դավիթ սրկ. ՍԵՐԳԵՅԵՆԿՈ
Հայկ Ճատուկյան

«Այծերն ու գայլերը» առակի պատմական հետքերով

«Հավաքվեցին այծերը միասին և պատգամ ուղարկեցին գայլերի ազգին և ասացին, թե ինչու մեր մեջ լինի անհաշտ խռովություն, այլ ոչ թե խաղաղություն: Եվ հավաքվեցին գայլերը և ուրախացան մեծ ուրախությամբ և նամակով պատգամ ուղարկեցին այծերի ազգին, նաև անթիվ ընծաներ: Եվ գրեցին այծերին:

«Լսեցինք ձեր բարի խորհուրդը և զոհանում ենք Աստծուց, որովհետև մեզ համար մեծ խնդություն է և խաղաղություն. նաև իմացնում ենք ձերո՞ր իմաստության, որ հովիվն ու շներն են պատճառ և սկիզբ մեր խռովության և կռվի. և եթե նրանց վերացնենք մեջտեղից, շուտով խաղաղություն կլինի»:

Լսեցին այծերը, հաստատեցին և ասացին.

— Իրավացի են գայլերը, որ մեզ սպանում են, որովհետև շները և հովիվը նրանց հալածում են մեզմիջ:

Եվ այծերը վտարեցին շներին և հովիվին և երդվեցին, որ հարյուր տարի մնան անխախտելի սիրով: Եվ այծերը ցրվեցին լեռները և դաշտերը և սկսեցին ուրախ լինել և ցնծալ և խաղալ, որովհետև արածում էին լավ արոտներում, ուտում էին համեղ խոտեր, խմում էին պաղ ջրեր և խնդում էին և վազվզում էին՝ փառք տալով, որ հասան բարի ժամանակի:

Եվ գայլերը համբերեցին հարյուր օր, ապա հավաքվեցին դասդաս, ընկան այծերի վրա և կերան» (փոխադրությունը գրաբարից՝ Ակսել Բակունցի):

Հայոց մեծամուն վարդապետ, աստվածաբան, քարոզիչ և առակագիր Վարդան Այգեկցու (12—13-րդ դդ.) ստեղծագործություններն իրենց իմաստությամբ և ուսանելիությամբ միջնադարից ցայսօր հայ ժողովրդին հոգևոր սնունդ են ջամբում: Եվ հատկապես իրենց մատչելիությամբ ու խորիմաստությամբ սիրելի են ու խանապագ ընթերցելու համընթացելու նրա բարոյախրատական առակները, որոնց մեջ ի մասնավորի հույժ ուսանելի է «Այծերն ու գայլերը»

վերտառությամբ առակը: Հեղինակը կարճամփոփ, բայց շատ բովանդակալից սույն առակում բացահայտում է այծերի կարճամտությունը՝ իրենց ոխերիմ թշնամիների հետ հավիտենական խաղաղություն հաստատելու առնչությամբ, ինչն այնքան արդիական է մեր օրերում, որ առաջին հայացքից կարող է թվալ մինչև իսկ մարգարեական: Այս առակը հոգևոր չափման մեջ ազգային մտայնության ու հոգեբանության որոշակի առանձնահատկության՝ որպես անվերջանալի դժբախտությունների և չարիքների պատճառներից մեկի ի հայտ բերման և զգուշացման խորհուրդն ունի՝ առ հայոց բոլոր սերունդները դարեդար:

Պատմությունն ու գրականությունը մասնավորապես այս մասին մեզ քիչ նյութեր ու փաստեր չեն տրամադրում՝ խորհելու, վերաբերվելու և եզրակացություններ անելու:

Այսպես՝ ակադեմիկոս Վ. Բարխուդարյանը գրում է. «Նորաստեղծ հայկական պետությունը, չունենալով դիվանագիտական փորձ և համապատասխան կադրեր, չկարողացավ ճկուն լինել միջազգային բարդ իրադրության պայմաններում: Մինչև վերջին պահը (պարտությունը թուրք-հայկական պատերազմում) կառավարությունը հետևում էր արևմտյան կողմնորոշմանը, շարունակում էր սպասել «լիակատար հիսաթափությունը» (Ալ. Խատիսյանի արտահայտությունը) եվրոպական դաշնակից տերություններից և ԱՄՆ-ից, չնայած ակնհայտ էր, որ նրանք ցանկություն չունեին օգնության գալու Հայաստանին, իրականացնելու Սևրի պայմանագրով նախատեսված որոշումները» («Հայոց պատմություն», 1996, էջ 275):

Հայ պատմիչ Առաքել Դավրիժեցին, իր «Պատմություն» մեծարժեք աշխատությունում անդրադառնալով Կաթոլիկ եկեղեցու՝ Հայաստանում և հայկական գաղթօջախներում ծավալած ունիթորական շարժման երկրորդ շրջանին՝ ծայր առած 16-րդ դարի վերջերից, գրում է, որ ֆռանկ

հայրերը (իմա՝ կաթոլիկ միաբանները) վխտում էին ամենուր՝ ոմանց կաշառելով, իսկ մյուս բոլորին էլ նենգաբար հավատակից եղբայրներ ներկայանալով, այնինչ «պարզամիտ հայերը չգիտեին, թե նրանք ինչ նպատակով էին շրջում.... Իրենց հետ քարտեզաման մի գիրք ունեին իրենց լեզվով ու տառերով, որ ճշտորեն ու անսխալ ցույց էր տալիս, թե որտեղ են սրբերի գերեզմաններն ու դամբարանները...., և շրջելով վանքերում՝ նրանք այն գրքով գտնում էին սրբերի մշխարները, վանքերի բնակիչներին բան էին տալիս և մշխարները առնում էին»: Այս ամոթալի գործունեությունը, բարեբախտաբար, դադարեց այն բանից հետո, երբ երկու հայ եպիսկոպոսներ, մտնելով Ս. Հռիփսիմե եկեղեցի, տեսան՝ ինչպես են երեք կաթոլիկ միաբաններ քանդած գերեզմանից մեր մեծ սրբուհու մշխարները գողանում. ծեծկռուքի են բռնվում, մինչև որ գործը բարձրագույն ատյաններին է հասնում, և այդպես հրաշքով սրբությունները փրկվում են:

Հայոց բառարաններում «միամիտ» բառը բացատրվում է հետևյալ կերպ՝ պարզամիտ, հետին միտք չունեցող, կարճամիտ, անհեռատես, անփորձ, որ գործի միայն մի կողմն է տեսնում: Այնինչ հոգեբանական բառարաններում կարդում ենք. «Հոգեբանական վիճակ, որ մարդկանց մեջ միայն բարությունն ու անկեղծությունն է տեսնում՝ իսպառ անտեսելով հնարավոր ծածուկ նենգ ծրագրերն ու սպառնալիքները»:

Ռ. Անգալադյանն այս չափազանց զգայուն խնդրի մասին «Հայերն ու իրենները (Եթնիկ-պետական զուգահեռներ)» հոդվածում գրում է. «Հայտնի է, որ հայերի ազգային խառնվածքում զգացմունքային-ռոմանտիկ սկիզբը համադրվում է ծայրահեղ ռացիոնալիզմի հետ: Միջակայցված ունիվերսալները (ըստ հեղինակի՝ հույսն իրենց վրա դնողները) կառուցում են իրենց անիրականալի դրակներն ու հեթիաթներ հյուսում պետական հարցերի շուրջ, իսկ

կենցաղային, առօրյա կյանքում ծայրահեղ հաշվեցնկատ են... Հենց այդ միջակայքումն է, որ կործանել է հայոց պետականությունը վաղ միջնադարում և այսօր էլ շարունակում է ղեկավարել հասարակությանը» («Գարուն», 2001, թիվ 2):

Այնպես որ զգացմունքային-ռոմանտիկ բնույթը՝ իր խիստ ազգային առանձնահատկությամբ, լիովին կարող է իր մշտական տեղը գտնել «միամիտ» բառի երկարուծիգ նշանակությունների ցանկում:

Գրեթե նույն միտքը, բայց փոքրինչ այլ կերպ արտահայտում է նաև Դերեմիկ Դեմիրճյանն իր՝ թերևս հայի հոգեբանական բնութագիրներից լավագույնի մեջ՝ «Հայը» հոդվածում. «Դիպլոմատիայի մեջ հայը մի բանումն է շատ հոգաժու՝ անկեղծ լինել: Այնքան անկեղծ է և միամիտ, որ անկասկածելի խորամանկի և կեղծավորի տպավորություն է անում: Մինչդեռ իր հարևանները՝ այս աշխարհի բեմի վրա դեր կատարելով միայն, ցույց են տալիս, թե կացնով հարվածում են դիմացինին, հայը իսկապես կացինը իջեցնում է գլխին: «Ապա ճշմարտությունը»,— մտա-հոգվում է նա.... Անկարգ է և անիշխանական թե՛ հասարակության, թե՛ պետության և թե՛ զաղափարների մեջ: Իբրև ժողովրդական՝ անմիաբան է, անտանելի, խռովարար....

Կոտորածներից ամենագար-հուրելին ինքը տեսավ, և ինքն էր, որ չխրատվեց: Իր օրինատացիան բացակայի օրինատացիան է: Թաթմարն է մոտը, սպասեց ռուսին. ռուսը եկավ, աչքը եվրոպացուն էր. եկավ անգլիացին, դարձյալ ռուսին էր սպասում: Ռո՛ւսն է գալիս, չի ընդունում... Ուրեմն իր պետությունն է ուզում ստեղծել, ինչ իմանաս... Մի ձեռք ճանկռտելով հիմնում է այդ պետությունը, մյուս ձեռքը ճիգ է անում հիմքից քանդելու»:

Հովհաննես Թումանյանը՝ ամենայն հայոց բանաստեղծը, ասես մեր իսկ օրերի համար գրած լինի. «Հայկական հարցը վայրենի կոտորածների և կեղեքումների հարց է: Հալածանքների ու գաղթականությունների հարց է: Նա գերազան-

ցապես ֆիզիկական գոյության խնդիր է: Եվ նրա հաջողությունը միշտ կապված է եղել Ռուսաստանի հաջողության հետ: Ով վեր է կացել Ռուսաստանի հաջողության դեմ, վեր է կացել Հայկական հարցի հաջողության դեմ, և ով Ռուսաստանի դեմ պաշտպանել է Տաճկաստանին, նա մեղսակից է տաճկական գազանություններին ու Հայկական սարսափներին: Նա պատասխանատու է հայ ժողովրդի ծով արյան ու մարդկության պատմության առաջ: Եվ տեղ չկա խուսափելու» (Երկերի լիակատար ժողովածու, հտ. 7, Երևան, 1995, էջ 15—16):

Այգեկցու սույն առակը սուրբգրային խորհուրդ ունի նաև, այն է՝ ճանաչել աշխարհն այնպիսին, ինչպիսին որ է՝ իր չարիքով ու բարիքով հանդերձ, հաղթահարելով դյուրահավատությունը՝ երբեք և ոչ մի պարագայում չվստահել, չհավատալ թշնամուն, ինչպես այդ մասին ուսուցանում են Հին Կտակարանի իմաստության գրքերը. «Եթե քո թշնամին քեզ աղաչի և բարձր ձայնով աղերսի, մի՛ հավատա նրան, քանզի յոթը չարիք կա նրա սրտում: Ով թաքցնում է ատելությունը, նա հայտնի է դարձնում նենգությունը» (Առակ. 26.25—26): Կամ՝ «Հավիտյան մի՛ հավատա քո թշնամուն, քանզի ինչպես պղինձն է ժանգոտում, այնպես էլ նրա չարությունը: Թշնամին քաղցր է իր շրթունքներով, բայց իր սրտում խորհում է խորխորատի մեջ քեզ կործանելու մասին: Թշնամին իր աչքերով է արտասվում, բայց եթե հարմար պահ գտնի, արյունից չի հագեճա» (Սիրաք 12. 10, 15, 17):

Հարկ է նաև միշտ հիշել մեկ այլ սուրբգրային խորհուրդ՝ նախորդից ոչ պակաս կարևոր, այն է՝ խրատվել չկանեցողները՝ պատվիրաններն անտեսողները, ըստ 59-րդ սաղմոսի՝ «հիմարության գինի» կխմեն, այսինքն՝ կպատժվեն, այնինչ խրատ լսող բարեպաշտներն ու հնազանդները կվայելեն Աստծո բարիքները:

Գրիգոր ԴԱՐԲԵՆՅԱՆ

Եկեղեցիների ոչնչացումը Երևանում խորհրդային բռնապետության օրոք

← էջ 5

Նա՝ մեծ գիտնականն ու հնագետը, չէր կարող անտարբեր մնալ Հայաստանի պատմական արժեքների ճակատագրի հանդեպ և համար պայքար էր մղում եկեղեցիները քանդելու դեմ: 1937 թ. հունվարի 19-ին Ա. Քալանթարն ընդարձակ նամակով դիմեց հայ բուլշևիկների ղեկավար Ամատունուն. «Ձեր ուշադրությունն եմ հրավիրում Կաթողիկեի՝ իբր կարևոր պատմական հուշարձանի քանդումի վրա, որ ներկայումս կատարվում է Երևանում, քաղխորհրդի կողմից: Երևանը հարուստ չէ պատմական հուշարձաններով, հազիվ երկու-երեք հատ, այն էլ վերջին դարերի անճաշակ նորոգումներով արտաքուստ պլանդակված դրությամբ, որով, սակայն, նրանք կորցնում են իրենց գիտական արժեքը:

Կաթողիկեն պատկանում է խոր հնության: Ներկայիս շենքը իր պլանով 7-րդ դարի է, սակայն բազմիցս նորոգված, և կաթողիկե (այս կոչումը ճարտարապետական տիպը որոշող տերմին է) վերջին մասը բոլորովին փոխված է: Ենթի արևմտյան մասը, որի մշակումը կատարված է 10—11-րդ դարե-

րում, զարմանալիորեն մինչև այժմ մնացել է նույնությամբ, անավարտ, առանց ռեստավրացիաների մինչև վերին մասը՝ դիմանալով անգամ Երևանի մեծ երկրաշարժին 17-րդ դարում (1679 թ.), այդ երևում է նաև նրանից, որ զմբեթի հենց տակը գտնվում է 13-րդ դարի սկզբի մի կարևոր ընդարձակ արձանագրություն (հակառակի պես հենց այս մասում է այս րոպեիս կենտրոնացված քանդումը):

Կաթողիկեն բոլորովին ուսումնասիրված չէ, և քանդումից առաջ էլ ոչ մի, թեկուզ մախնական հետազոտություն կատարված չէ: Այն հապճեպությամբ, որ կատարվում է այս քանդումը, հնարավոր չէ նայել անգամ, ուր մնաց ֆիլցիայի ենթարկել, ազատել կամ ուսումնասիրել բացվող արժեքները: Բայց նրանք կան....

Սրանք Երևանի հնագույն պատմության միակ փաստաթղթերն են, հայ արվեստի կոթողները, ուստի և անթույլատրելի է նրանց ոչնչացումն այն ձևով, ինչպես այդ կատարվում է ներկայումս քաղխորհրդի կողմից:

Ելնելով վերոհիշյալից՝ խնդրում եմ կարգադրել կանգնեցնել քան-

դումը և հանձնարարել հատուկ մասնագիտական ժողովին՝ կատարելու շտապ հետազոտություն և նրա արդյունքն այդ հուշարձանի գիտական արժեքի մասին ձեզ ներկայացնելու զեկուցագրով»:

Ամատունին այս մամակը մակագրեց Հանեսօղլյանին. «Խնդրում եմ հաստատել այս հարցը և մտցնել բյուրո», այն նույն Հանեսօղլյանին, որը ժամանակին Ս. Պողոս-Պետրոս եկեղեցու քանդման հեղինակներից էր, իսկ այժմ պետք է ավերեր մեկ այլ պատմական կոթող: Պրոֆեսոր Ա. Քալանթարին շուտով մոռացան, իսկ նրա առաջ քաշած հարցն այդպես էլ չքննարկեցին Կենտկոմի բյուրոյում, ու մամակն անհետացավ արխիվներում: 1938 թ. որպես ժողովրդի թշնամի՝ ձերբակալվեց նաև Աշխարհբեկ Քալանթարը և մի քանի տարի հետո՝ հավանաբար 1942-ին, մահացավ աքսորավայրում:

1940-ական թթ. երկրորդ կեսին քանդվեցին Երևանի Ա. Աստվածածին և Ա. Լուսավորիչ եկեղեցիները: Նորքի Ա. Աստվածածին եկեղեցին քանդվեց 1947 թ., իսկ Ա. Գրիգոր Լուսավորիչ եկեղեցին՝ 1949 թ.:

Ա. Լուսավորիչ եկեղեցին գործել է 1900—1926 թթ.: 1920-ական թթ. այն վերածվեց «Անաստված» կիճո և տիկնիկային թատրոնների: 1947 թ. մայիսի 14-ին ջրիեղեղի պատճառով այդտեղ բնակություն էին հաստատել տուժածները: Եկեղեցին սկսեցին քանդել 1949-ի ամռանը: Իշխանություններն ստիպեցին, որ եկեղեցին քանդեն գերմանացի ռազմագերիները, սակայն վերջիններս հրաժարվեցին: Իշխանությունների հրահանգով Ամիրյան փողոցը փակեցին 10—15 բեռնատար մեքենայով, ապա եկեղեցու զմբեթի խաչը ճոպանով կապելով բեռնատարին՝ քաշեցին և խաչը տապալեցին: Երկու ամիս անընդհատ քանդում էին եկեղեցին, բայց չէին կարողանում ավերել. չափից ավելի ամուր էր մինչխորհրդային կառույցը: Հետո եկեղեցու մի մասը քանդեցին՝ պատի մեջ տեղադրելով պայթուցիկ նյութ և պայթեցնելով այն: Հետագայում փլուզված քարերի մի մասն օգտագործվեց դպրոցի շինարարության համար:

Ինչպես արդարացի նկատել է Ա. Քալանթարը, Երևանը հարուստ չէր պատմական հուշարձաններով, և եղածը պետք էր զգուշությամբ

և ապահով պահպանել գալիք սերունդների համար, ոչ թե բարբարոսաբար նրան զրկել իր հոգևոր ժառանգությունից ու հարստությունից:

Ստեփան ՍՏԵՓԱՆՅԱՆՑ, պ. գ. դ.

ՔՐԻՍՏՈՆՅԱՂ ՀԱՅԱՍՏԱՆ

Կրոնական, մշակութային, լրատվական երկշաբաթաթերթ

Հիմնադիր՝
Մայր Աթոռ Սուրբ Էջմիածին

Հրատարակիչ՝
«Քրիստոնյա Հայաստան»
թերթի խմբագրություն

Գլխավոր խմբագիր՝
Նարինե Հովհաննիսյան

Գրանցման վկայական՝ 624
Խմբագրության հասցեն՝
Մայր Աթոռ Սուրբ Էջմիածին

Հեռախոս՝ (010) 517 280

Էլ. փոստ՝
qristonyahayastan1@gmail.com
qristhay@etchmiadzin.am

web կայք՝
krishayas.wordpress.com
etchmiadzinlibrary.am/en/
kristonya-hayastan

Ստոր. տպագր. 1.08.2025 թ.
Տպաքանակը՝ 1265